

經

C40
4514
62

東京大学総合図書館所蔵



C40-4574

了翁上座請大猷及有
家書置武州紫雲山
我微英塔院庭府中未
為學者天啟許出院內
曹山二世鐵牛樹謹誌



B 64853

觀世音菩薩得大勢菩薩受記經

劉宋黃龍沙門釋曇無竭譯

如是我聞一時佛在波羅奈仙人鹿苑中與大比丘
衆二萬人俱菩薩萬二千其名曰師子菩薩師子意
菩薩安意菩薩無喻意菩薩持地菩薩那羅達菩薩
神天菩薩寶事菩薩伽猴多菩薩賢力菩薩明天菩
薩愛喜菩薩文殊師利菩薩智行菩薩專行菩薩現
無癡菩薩彌勒菩薩如是等上首菩薩摩訶薩萬二
千人俱復有二萬天子善界天子善住天子等以爲
上首皆住大乘爾時世尊與無量百千眷屬圍繞而

卷上

觀世音菩薩得大勢菩薩受記經

一

卷六

爲說法爾時會中有一菩薩名華德藏卽從座起偏袒右肩右膝著地合掌向佛而作是言惟願世尊賜我中間欲有所問佛告華德藏菩薩恣汝所問諸有疑者吾已知之當爲解說令汝歡喜爾時華德藏白佛言世尊菩薩摩訶薩云何不退轉於阿耨多羅三藐三菩提及五神通得如幻三昧得是三昧以善方便能化其身隨衆形類所成善根而爲說法令得阿耨多羅三藐三菩提佛告華德藏菩薩摩訶薩善哉善哉能於如來等正覺前問如是義汝華德藏已於過去諸佛植諸善根供養無數百千萬億諸佛世尊

於諸衆生興大悲心善哉華德藏諦聽諦聽善思念之當爲汝說對曰唯然願樂欲聞佛告華德藏菩薩摩訶薩成就一法得如幻三昧得是三昧以善方便能化其身隨衆形類所成善根而爲說法令得阿耨多羅三藐三菩提何等一法謂無依止不依三界亦不依內又不依外於無所依得正觀察正觀察已便得正盡而於覺知無所損減以無滅心悉度正慧謂一切法從緣而起虛假而有一切諸法因緣而生若無因緣無有生法雖一切法從因緣生而無所生如是通達無生法者得入菩薩真實之道亦名得入大

慈悲心憐愍度脫一切衆生善能深解如是義已則知一切諸法如幻但以憶想語言造化法耳然此憶想語言造化諸法究竟悉空善能通達諸法空已其名逮得如幻三昧得三昧已以善方便能化其身隨衆形類所成善根而爲說法令得阿耨多羅三藐三菩提爾時華德藏菩薩摩訶薩白佛言世尊於此衆中頗有菩薩得是三昧乎佛言有今是會中彌勒菩薩文殊師利等六十正士不可思議大誓莊嚴得是三昧又白佛言世尊唯此世界菩薩得是三昧他方世界復有菩薩成就如是如幻三昧佛告華德藏西

方過此億百千刹有世界名安樂其國有佛號阿彌陀如來應供正徧知今現在說法彼有菩薩一名觀世音二名得大勢得是三昧復次華德藏若有菩薩從彼正士七日七夜聽受是法即便逮得如幻三昧華德藏菩薩白佛言世尊彼國應有無量菩薩得是三昧何以故其餘菩薩生彼國者皆當往至彼正士所聽受是法佛言如是如是如汝所言有無量阿僧祇菩薩摩訶薩從彼正士得是三昧華德藏菩薩白佛言善哉世尊如來應供正徧知願以神力令彼正士至此世界又令彼此兩得相見何以故以彼正士

30
1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

至此刹故善男子善女人成善根者聞其說法得是三昧又願見彼安樂世界阿彌陀佛令此善男子善女人發阿耨多羅三藐三菩提心願生彼國生彼國已終不退轉阿耨多羅三藐三菩提爾時世尊受彼請已卽放眉間白毫相光徧照三千大千國土於此世界草木土石須彌山王目真隣陀山大目真隣陀山所迦羅山大所迦羅山乃至世界中間幽冥之處普皆金色莫不大明日月暉曜及大力威光悉不復現徧照西方億百千刹乃至安樂世界悉皆金色大光右繞彼佛七帀於如來前廓然不現彼國衆生菩

薩聲聞悉見此土及釋迦文與諸大衆圍繞說法猶如掌中觀阿摩勒果皆生愛樂歡喜之心唱如是言南無釋迦如來應供正徧知於此衆會比丘比丘尼優婆塞優婆夷天龍夜叉乾闥婆阿修羅迦樓羅緊那羅摩睺羅伽人非人等釋梵四天王菩薩聲聞皆見安樂世界阿彌陀佛菩薩聲聞眷屬圍繞晃若寶山高顯殊特威光赫奕普照諸刹如淨目人於一尋內觀人面貌明了無礙旣見是已歡喜踊躍唱如是言南無阿彌陀如來應供正徧知時此衆中八萬四千衆生皆發阿耨多羅三藐三菩提心及種善根願

生彼國爾時安樂世界菩薩聲聞見此刹已怪未曾
有歡喜合掌禮釋迦牟尼如來應供正徧知作如是
言南無釋迦牟尼佛能爲菩薩聲聞說如是法爾時
安樂世界六種震動動徧動等徧動搖徧搖等徧搖
震徧震等徧震爾時觀世音及得大勢菩薩摩訶薩
白彼佛言甚竒世尊釋迦如來現希有事何以故彼
釋迦牟尼如來應供正徧知少現名號令無量大地
六種震動爾時阿彌陀佛告彼菩薩釋迦牟尼不但
此土現其名號其餘無量諸佛世界悉現名號大光
普照六種震動亦復如是彼諸世界無量阿僧祇衆

生聞釋迦牟尼稱譽名號善根成就皆得不退轉於
阿耨多羅三藐三菩提時彼衆中四十億菩薩聞釋
迦牟尼如來應供等正覺名號同聲發願善根迴向
阿耨多羅三藐三菩提佛卽授記當得阿耨多羅三
藐三菩提爾時觀世音及得大勢菩薩摩訶薩詣彼
佛所頭面禮足恭敬合掌於一面住白佛言世尊釋
迦牟尼放此光明何因何緣爾時彼佛告觀世音如
來應供等正覺放斯光明非無因緣何以故今日釋
迦牟尼如來應供正徧知將欲演說菩薩珍寶處三
昧經故先現瑞爾時觀世音及得大勢菩薩摩訶薩

白佛言世尊我等欲詣娑婆世界禮拜供養釋迦牟尼佛聽其說法佛言善男子宜知是時時二菩薩卽相謂言我等今日定聞彼佛所說妙法時二菩薩受佛教已告彼四十億菩薩眷屬善男子當共往詣娑婆世界禮拜供養釋迦牟尼佛聽受正法何以故釋迦牟尼如來應供等正覺能爲難事捨淨妙國以本願力興大悲心於薄德少福增貪恚癡濁惡世中成阿耨多羅三藐三菩提而爲說法說是語時菩薩聲聞同聲歎言彼土衆生得聞釋迦牟尼如來應供正徧知名號快得善利何況得見發歡喜心世尊我等

當共詣彼世界禮拜供養釋迦牟尼佛言善男子宜知是時爾時觀世音及得大勢菩薩摩訶薩與四十二億菩薩前後圍繞於彼世界以神通力各爲眷屬化作四十億莊嚴寶臺是諸寶臺縱廣十二由旬端嚴微妙其寶臺上有處黃金有處白銀有處琉璃有處頗梨有處赤珠有處磔磔有處碼碯有處二寶黃金白銀有處三寶金銀琉璃頗梨赤珠有處六寶黃金頗梨有處五寶金銀琉璃頗梨赤珠有處七寶乃至碼碯又以白銀琉璃頗梨磔磔赤珠有處七寶乃至碼碯又以赤珠梅檀優鉢羅鉢曇摩拘物頭分陁利而莊嚴之

又雨須曼那華蔭葡萄華波羅羅華阿提目多華羅尼
華瞿羅尼華曼陀羅華摩訶曼陀羅華波樓沙華摩
訶波樓沙華曼殊沙華摩訶曼殊沙華盧遮那華摩
訶盧遮那華遮迦華摩訶遮迦華蘇樓至遮迦華梅
那華摩訶梅那華蘇樓至梅檀那華梅奴多羅華他
羅華摩訶他羅華其寶臺上種種雜色徧爛焯曄清
淨照曜諸寶臺上有化玉女八萬四千或執箜篌琴
瑟箏笛琵琶鼓貝如是無量衆寶樂器奏微妙音儼
然而住或有玉女執赤梅檀香沉水梅檀香或執黑
沉水梅檀香儼然而住或有玉女執優波羅波頭摩

拘物頭分陀利華果儼然而住或有玉女執曼陀羅
華摩訶曼陀羅華波樓沙華摩訶波樓沙華盧遮那
華摩訶盧遮那華梅那華摩訶梅那華蘇樓至梅那
華遮迦華摩訶遮迦華蘇樓至遮迦華陀羅華摩訶
陀羅華蘇樓至陀羅華莊嚴而住或有玉女執一切
華果儼然而住諸寶臺上衆寶莊嚴師子之座座上
皆有化佛三十二相八十種好而自嚴身臺上各懸
八萬四千青黃赤白雜真珠貫諸寶臺上各有八萬
四千衆妙寶瓶盛滿末香列置其上諸寶臺上各有
八萬四千衆寶妙蓋彌覆其上諸寶臺上各有八萬

四千衆妙寶樹植立其上諸寶臺上各有八萬四千寶鈴羅網羅覆其上諸寶樹間有七寶池八功德水盈滿其中青黃赤白雜寶蓮華光色鮮映微風吹動衆寶行樹出微妙音其音和雅踰於天樂諸寶臺上各有八萬四千衆妙寶繩連綿樹間一一寶臺光明照曜八萬四千由旬莫不大明爾時觀世音及得大勢菩薩摩訶薩與其眷屬八十億衆諸菩薩俱莊嚴寶臺悉皆同等譬如力士屈伸臂頃從彼國沒至此世界時彼菩薩以神通力令此世界地平如水與八十億菩薩前後圍繞以大功德莊嚴成就端嚴殊特

無可爲喻光明徧照娑婆世界是諸菩薩詣釋迦牟尼佛所頭面禮足右繞七匝却住一面白佛言世尊阿彌陀佛問訊世尊少病少惱起居輕利安樂行不又現彼土莊嚴妙事時此菩薩及聲聞衆見此寶臺衆妙莊嚴歎未曾有各作是念此諸寶臺莊嚴微妙從安樂國至此世界爲是佛力菩薩力耶爾時華嚴藏菩薩承佛神力白佛言甚奇世尊未曾有也今此娑婆世界衆妙寶臺莊嚴如是是誰威力佛言是觀世音及得大勢神通之力於此世界現大莊嚴甚奇世尊不可思議彼善男子願行清淨能以神力莊嚴

寶臺現此世界佛言如是如是如汝所說彼善男子
已於無數億那由他百千劫中淨諸善根得如幻三
昧住是三昧能以神通變化現如是事又華德藏汝
今且觀東方世界爲何所見時華德藏卽以菩薩種
種天眼觀於東方恒河沙等諸佛世界見彼佛前皆
有觀世音及得大勢莊嚴如前恭敬供養皆稱阿彌
陀佛問訊世尊少病少惱起居輕利安樂行不南西
北方四維上下亦復如是爾時華德藏菩薩見是事
已歡喜踊躍得未曾有而白佛言甚竒世尊今此大
士乃能成就如是三昧何以故今此正士能現莊嚴

是諸佛剎爾時世尊卽以神力令此衆會見是事已
三萬二千人發阿耨多羅三藐三菩提心華德藏菩
薩白佛言世尊是二正士又如發阿耨多羅三藐三
菩提心於何佛所唯願說之令諸菩薩修此願行具
足成就佛言諦聽善思念之當爲汝說善哉世尊願
樂欲聞佛言乃往過去廣遠無量不可思議阿僧祇
劫我於爾時爲百千王時初大王劫欲盡時有世界
名無量德聚安樂示現其國有佛號金光師子遊戲
如來應供正徧知明行足善逝世間解無上士調御
丈夫天人師佛世尊是佛剎土所有清淨嚴飾之事

今爲汝說於意云何安樂世界阿彌陀佛國土所有
嚴淨之事寧爲多不答曰甚多不可思議難可具說
佛告華德藏假使有人分析一毛以爲百分以一分
毛滴大海水於意云何一毛端水於大海水何者爲
多答曰海水甚多不可爲譬如是華德藏應作是知
阿彌陀國莊嚴之事如毛端水金光師子遊戲佛國
如大海水聲聞菩薩差降亦爾彼金光師子遊戲如
來亦爲衆生說三乘法我於恒沙等劫說此佛國功
德莊嚴菩薩聲聞快樂之事猶不能盡爾時金光師
子遊戲如來法中有王名曰威德王千世界正法治

化號爲法王其威德王多諸子息具二十八大人之
相是諸王子皆悉住於無上之道王有七萬六千園
觀其王諸子遊戲其中華德藏白佛言世尊彼佛刹
土有女人耶佛言善男子彼佛國土尚無女名何況
有實其國衆生淨修梵行純一化生禪悅爲食彼威
德王於八萬四千億歲奉事如來不習餘法佛知至
心卽爲演說無量法印何等爲無量法印華德藏菩
薩凡所修行應當發於無量誓願何以故菩薩摩訶
薩布施無量持戒無量忍辱無量精進無量禪定無
量智慧無量所行六度攝生死無量慈愍衆生無量

莊嚴淨土無量成就色無量音聲無量辯才無量華
德藏乃至一念善根應迴向無量云何迴向無量如
迴向一切衆生令一切衆生得無生證以佛涅槃而
般涅槃是名迴向無量無量空無量無相無量無願
無量無行如是無欲實際法性無生無著解脫涅槃
無量善男子我但略說諸法無量何以故以一切法
無限量故復次華德藏彼威德王於其園觀入於三
昧其王左右有二蓮華從地湧出雜色莊嚴其香芬
馥如天栴檀有二童子化生其中加趺而坐一名寶
意二名寶上時威德王從禪定起見二童子坐蓮華

藏以偈問曰

汝爲天龍神 夜叉鳩槃荼 爲人爲非人
願說其名號

時王右面童子以偈答曰

一切諸法空 云何問名字 過去法已滅
當來法未生 現在法不住 仁者問誰名
空法亦非人 非龍非羅刹 人與非人等
一切不可得

左面童子而說偈言

名名者悉空 名名不可得 一切法無名

而欲問名字 欲求真實名 未曾所見聞
夫生法卽滅 云何而問名 說名字語言
皆是假施設 我名爲寶意 彼名爲寶上
華德藏是二童子說是偈已與威德王俱詣佛所頭
面禮足右繞七巾合掌恭敬於一面住時二童子卽
共同聲以偈問佛

云何爲供養 無上兩足尊 願說其義趣
聞者當奉行 華香衆妓樂 衣服藥臥具
如是等供養 云何爲最勝
爾時彼佛卽爲童子而說偈言

當發菩提心 廣濟諸羣生 是則供正覺
三十二明相 設滿恒沙刹 珍妙莊嚴具
奉獻諸如來 及歡喜頂戴 不如以慈心
廻向於菩提 是福爲最勝 無量無有邊
餘供無過者 超踰不可計 如是菩提心
必成等正覺

時二童子復說偈言

諸天龍鬼神 聽我師子吼 今於如來前
弘誓發菩提 生死無量劫 本際不可知
爲一衆生故 爾數劫行道 況此諸劫中

度脫無量衆 修行菩提道 而生疲倦心
我若從今始 起於貪欲心 是則爲欺誑
十方一切佛 瞋恚愚癡垢 慳嫉亦復然
今我說實語 遠離於虛妄 我若於今始
起於聲聞心 不樂修菩提 是則欺世尊
亦不求緣覺 自濟利己身 當於萬億劫
大悲度衆生 如今日佛土 清淨妙莊嚴
今我得道時 超踰億百千 國無聲聞衆
亦無緣覺乘 純有諸菩薩 其數無限量
衆生淨無垢 悉具上妙樂 出生於正覺

總持諸法藏

此誓若誠實

當動大千界

說如是偈已

應時普震動

百千衆妓樂

演發和雅音

光曜微妙服

旋轉而來降

諸天於空中

雨散衆末香

其香普流熏

悅可衆生心

佛告華德藏於汝意云何爾時威德王者豈異人乎
我身是也時二童子今觀世音及得大勢菩薩摩訶
薩是也善男子是二菩薩於彼佛所初發阿耨多羅
三藐三菩提心爾時華德藏白佛言甚奇世尊是善
男子未曾發心成就如是甚深智慧了達名字悉不

可得世尊是二正士於彼先佛已曾供養作諸功德
善男子此恒河沙悉可知數而此大士先供養佛種
諸善根不可稱計雖未發於菩提之心而以不可思
議而自莊嚴於諸衆生爲最勇猛爾時華德藏菩薩
白佛言世尊其無量德聚安樂示現國土爲在何方
佛言善男子今此西方安樂世界當於爾時號無量
德聚安樂示現華德藏菩薩白佛言世尊願爲解說
令無量衆生得大利益是觀世音於何國土成等正
覺世界莊嚴光明名號聲聞菩薩壽命所有乃至成
佛其事云何世尊說是菩薩先所行願其餘菩薩

聞是願已必當修行而得滿足佛言善哉諦聽當爲
汝說對曰唯然願樂欲聞佛言善男子阿彌陀佛壽
命無量百千億劫當有終極善男子當來曠遠不可
計劫阿彌陀佛當般涅槃般涅槃後正法住世等佛
壽命在世滅後所度衆生悉皆同等佛涅槃後或有
衆生不見佛者有諸菩薩得念佛三昧常見阿彌陀
佛復次善男子彼佛滅後一切寶物浴池蓮華衆寶
行樹常演法音與佛無異善男子阿彌陀佛正法滅
後過中夜分明相出時觀世音菩薩於七寶菩提樹
下結加趺坐成等正覺號普光功德山王如來應供

正徧知明行足善逝世間解無上士調御丈夫天人
師佛世尊其佛國土自然七寶衆妙合成莊嚴之事
諸佛世尊於恒沙劫說不能盡善男子我於今者爲
汝說譬彼金光師子遊戲如來國土莊嚴之事方於
普光功德山王如來國土百倍千倍千萬億倍億兆
載倍乃至算數所不能及其佛國土無有聲聞緣覺
之名純諸菩薩充滿其國華嚴德藏菩薩白佛言世尊
彼佛國土名安樂耶佛言善男子其佛國土號曰衆
寶普集莊嚴善男子普光功德山王如來隨其壽命
得大勢菩薩親近供養至於涅槃般涅槃後奉持正

法乃至滅盡法滅盡已卽於其國成阿耨多羅三藐
三菩提號曰善住功德寶王如來應供正徧知明行
足善逝世間解無上士調御丈夫天人師佛世尊如
普光功德山王如來國土光明壽命諸菩薩衆乃至
法住等無有異若善男子善女人聞善住功德寶王
如來名者皆得不退於阿耨多羅三藐三菩提又善
男子若有女人得聞過去金光師子遊戲如來善住
功德寶王如來名者皆轉女人身却四十億劫生死
之罪皆不退轉於阿耨多羅三藐三菩提常得見佛
聞受正法供養衆僧捨此身已當得出家成無礙辯

經

卷之二十一

七

知六

逮得總持爾時會中六十億衆同聲歎言南無十方
般涅槃佛同心共議發阿耨多羅三藐三菩提心佛
卽授記當成阿耨多羅三藐三菩提復有八萬四千
那由他衆生遠塵離垢於諸法中得法眼淨七千比
丘漏盡意解爾時觀世音及得大勢菩薩卽以神力
令此衆會悉見十方無數諸佛世尊皆爲授其阿耨
多羅三藐三菩提記見已歎言甚竒世尊是諸如來
爲此大士授如是記爾時華德藏菩薩白佛言世尊
若善男子善女人於此如來甚深經典受持讀誦解
說書寫廣宣流布得幾所福唯願如來分別解說何

以故當來惡世薄福衆生於此如來甚深經典而不
信受以是因緣長夜受苦難得解脫世尊唯願說之
憐愍利益諸衆生故世尊今此會中多有利根善男
子善女人於當來世而作大明佛言華德藏善哉諦
聽當爲汝說對曰受教願樂欲聞佛言若善男子以
三千大千世界一切衆生置兩肩上盡其形壽隨所
須欲衣食臥具牀褥湯藥而供養之所得功德寧爲
多不甚多世尊若以慈心供一衆生隨其所須功德
無量何況一切佛言若善男子善女人於此經典受
持誦讀解說書寫種種供養廣宣流布發菩提心所

得功德百千萬倍不可爲譬華德藏菩薩白佛言世
尊我從今日於此如來所說經典及過去當來三佛
名號常當受持讀誦解說書寫廣宣流布遠離貪恚
癡心發阿耨多羅三藐三菩提終不虛妄世尊設我
成佛若有女人聞如是法現轉女身轉女身已當爲
授記得阿耨多羅三藐三菩提號曰離垢多陀阿伽
度阿羅訶三藐三佛陀說是經已華德藏菩薩摩訶
薩及諸比丘比丘尼菩薩聲聞天龍夜叉乾闥婆阿
修羅迦樓羅緊那羅摩睺羅伽人非人等聞佛所說
皆大歡喜

世音菩薩得大勢菩薩受記經

音釋

編爛

編通閑切爛離開踰羊朱切疲蒲糜切

天所

休寧黃浦禪院比丘海光施貴刻此
觀世音菩薩得大勢菩薩受記經一卷計字
六千五百零七個該銀三兩二錢五分
比丘解印對上元朱汝標刻
天啓丁卯四月徑山化城寺識

不思議光菩薩所說經

姚秦三藏鳩摩羅什譯

如是我聞一時佛在舍衛國祇陀林中給孤窮精舍
與大比丘僧千二百五十人俱菩薩摩訶薩五百人
眾所知識爾時世尊依舍衛大城時王大臣婆羅門
居士及諸眷屬供養恭敬尊重讚歎多諸供養衣服
飲食臥具醫藥是如來應供正徧覺明行足善逝世
間解無上士調御丈夫天人師佛世尊生處成就種
姓生成就三昧具足智慧具足解脫具足解脫知見
具足具足十力四無所畏佛十八不共法演說正法

卷第十

十一

經

下只義二菩薩所說

一

豆七

經
初中後善文義美妙具足清白梵行鮮淨五眼具足
所謂肉眼天眼慧眼佛眼法眼善知此世他世所住
于時世尊善降外道尼乾陀若提子等佛法熾盛人
天宗敬世尊時到著衣持鉢及比丘僧眷屬圍繞趣
入舍衛大城乞食去來進止威儀庠序視瞻容豫屈
伸俯仰執持衣鉢皆悉庠序金色妙身光明照曜猶
猛火聚寶珠日月照曜闇夜三十二相莊嚴其身以
金色足蹈門闢上當於是時舍衛大城示現種種未
曾有事如偈所說

人仙來入時

釋師子蹈闢

現多希有事

淨心聽我說	盲者得目視	聾者得聞聽
裸者得衣服	狂亂得正意	皆歡喜合掌
觀佛無厭足	衆鼓自然鳴	簫笛自出聲
鴈鴝鳩鴛鴦	出佛妙輶音	失財得寶藏
衆寶物出聲	時地六種動	不信得淨心
勝覺下轉足	淨蓮華承接	觸衆生安樂
命終得生天	女人妊娠苦	安樂生妙子
無貪瞋癡惱	父母子俱爾	階陞妙莊嚴
多億天雨花	衆生無病患	脫一切衆苦
善逝入城時	一切受安樂	各謂我奉食

各謂佛看我 人仙福德力 非我說能盡
爾時世尊於舍衛大城次第乞食至於中路有一空
處捐棄嬰兒容貌端嚴極爲鮮白自唎右指而此空
處多狐狼狗見是嬰兒舐已而去無能逼惱此嬰兒
者是福德人久種善根多人往觀生希有心往來觀
看空處棄兒端嚴可愛歡喜樂見於是嬰兒爾時世
尊見多人衆往來空處知而故問告阿難言汝可往
彼看是諸人往來空處何所作爲阿難白言如是世
尊大德阿難卽往空處見是嬰兒容貌端嚴自唎右
指諦視衆人其目不瞬阿難見已便還佛所如見而

說世尊此空閑處有棄嬰兒容貌端嚴甚可敬愛猶
如寶像觀視諸人其目不瞬于時世尊於彼嬰兒起
悲愍心觀本善根知己成熟堪能知我所說法義又
知衆生善根成熟卽往嬰兒所到已於一面住向此
嬰兒而說偈言

本所造惡業 今此報應現 棄捐此空處

嬰兒苦如是

爾時嬰兒承佛神力自本善力以偈報佛

瞿曇猶故有 見棄空處想 尊在道場時
不知是想耶

爾時世尊復以偈言

我已知於想 而我永無想 以憐愍汝故
來至此空處

爾時嬰兒復說偈言

若不得衆生 畢竟不可得 尊憐愍於誰
誰所轉悲心

爾時世尊復說偈言

衆生不知是 無我空寂滅 爲覺悟彼故
我行村城邑

爾時嬰兒復說偈言

達解空寂滅 覺了空寂滅 猶有衆生想
如來不斷耶

爾時世尊復說偈言

佛悲力如是 覺了空寂滅 教化衆生故
導師演說法

爾時嬰兒復說偈言

猶故有顛倒 如來未斷耶 無衆生思想
如是生悲耶

爾時世尊復說偈言

佛之所護持 菩薩生精進 爲不達衆生

人尊發莊嚴

爾時嬰兒復說偈言

此是癡莊嚴 若不得於物 若法非是物

何由起莊嚴

爾時世尊復說偈言

此大悲神力 調御世如是 猶不著於物

爲衆生說法

爾時嬰兒復說偈言

法無有文字 云何可演說 世間尊敗失

非法作法說

爾時世尊復說偈言

我不敗壞世 我不非法說 衆生自倒惑

我解脫彼結

爾時嬰兒復說偈言

結使無根本 亦無有方所 又不在內外

於何脫彼結

爾時世尊復說偈言

從於妄想生 與顛倒共俱 爲斷彼妄想

嬰兒我說法

爾時嬰兒復說偈言

心性自常淨 彼中無垢結 正使多妄想
性淨不生垢

爾時世尊復說偈言

如是如汝說 心性自常淨 客煩惱塵結
無慧者生染

爾時嬰兒復說偈言

結無有方所 亦非方所得 云何名爲客
願爲我演說

爾時世尊復說偈言

猶如空中雲 可觀無真實 結使生如是

雖見無有實

爾時嬰兒復說偈言

法同等如如 其生性卽如 法若是真實
非如不可得

爾時世尊復說偈言

一切非如法 等住於如中 覺了是如已
無過無功德

爾時嬰兒復說偈言

若不得衆生 瞿曇和合誰 先觀察法本
從誰有煩惱

爾時世尊復說偈言

過世及未來 及與現在世 佛知覺了了

爲衆生說法

爾時嬰兒復說偈言

所演說三世 及說我能知 便爲是大慢

則爲自稱譽

爾時世尊復說偈言

我不自稱譽 亦不輕慢他 如如等顯現

是故名如來

爾時嬰兒復說偈言

如無有可得 非言說相應 非言以言說

是則非是如

爾時世尊復說偈言

凡夫隨於想 如中生妄想 爲斷除我想

如來出於世

爾時嬰兒復說偈言

正覺無出世 善修無生故 於無生法中

佛出不相應

爾時世尊復說偈言

無生現有生 佛出世顯現 此是世諦說

非是第一義

爾時嬰兒復說偈言

猶故有二想 世諦第一義 於一乘道中

瞿曇相違說

爾時世尊復說偈言

我不道相違 我住不相違 爲相違衆生

嬰兒如是知

爾時嬰兒復說偈言

悔過於正覺 我上所言說 是佛力持故

我能如是說

爾時世尊從於衣裏出金色臂起彼嬰兒爾時嬰兒
執世尊手指從地而起爾時世尊從彼空處將是嬰
兒趣向正陌是時大衆得未曾有於世尊所倍生敬
禮歎言希有如來世尊得成如是勝妙之法乃能令
此極苦厄者安住是法爾時世尊告嬰兒言汝業行
盡汝可憶念本造善根令此大衆生希有心現大神
力爾時嬰兒上昇虛空過七多羅樹身放光明此光
徧照三千大千佛之世界以此光故釋梵護世及餘
百千天龍夜叉乾闥婆阿脩羅迦樓羅緊那羅摩睺
羅伽見斯光已來詣佛所到已頂禮佛足以諸天華

散供於佛供養佛已向佛世尊作如是言菩薩光明不可思議身出光明普徧照此佛之世界令諸無量衆生得於不思議利當名此兒不思議光爾時釋迦牟尼世尊印可是名此兒當名不思議光爾時嬰兒不思議光從空而下住於地已以佛神力自善根力其形猶如八歲童子爾時釋提桓因卽以天衣施與嬰兒便語之言嬰兒汝今愍我等故受此天衣勿裸形住爾時不思議光菩薩嬰兒語釋提桓因憍尸迦菩薩不以衣服爲妙當被法服以爲嚴飾憍尸迦菩薩所服汝今善聽憍尸迦善提之心是菩薩服乃至

道場成滿具足一切佛法有慚有愧是菩薩服調伏成就一切衆生置無過中堅誓莊嚴是菩薩服辦諸事故質直無僞是菩薩服成就斷除幻惑僞故勤加精進是菩薩服成滿具足諸善根故志欲喜樂是菩薩服成滿一切諸佛法故除捨憍慢是菩薩服成滿一切諸禪定故欲法聞法是菩薩服成滿般若波羅蜜故不起智慢是菩薩服成滿具足無著智故作於利益是菩薩服悲諸衆生具覺智故捨一切物是菩薩服成滿具足諸相好故護持淨戒是菩薩服成滿願故調和忍辱是菩薩服究竟成滿梵音聲故牢強

精進無解退心是菩薩服成滿出過一切事故得諸
禪定解脫三昧是菩薩服成就滿足大通智故不壞
智慧是菩薩服成就斷除一切結使諸見障故大方
便智是菩薩服成就教化諸衆生故大慈是菩薩服
成就救濟諸衆生故大悲是菩薩服成就於生死中
無疲厭故大喜是菩薩服成就具足於法喜故大捨
是菩薩服成就捨離愛瞋心故於諸衆生無惱害心
是菩薩服成就不惱於自他故敷演說法是菩薩服
成就不自譽毀他人故如說修行是菩薩服成就斷
除諸結使故憍尸迦應如是知菩薩法服以法莊嚴

生不裸形爾時釋提桓因於嬰兒所增加恭敬愛念
尊重白言世尊愍我等故令是嬰兒受取此衣爾時
世尊告不思議光菩薩嬰兒受帝釋衣于時世尊右
手取衣授與嬰兒爾時嬰兒右膝著地以其右手受
取是衣受已便著爾時世尊將不思議光菩薩嬰兒
於舍衛大城次第乞食是時大衆男女大小長者居
士刹利婆羅門王及輔臣見不思議光菩薩嬰兒生
希有心亦爲見佛禮敬供養皆悉來集爾時世尊次
第乞食到不思議光菩薩嬰兒所生母舍爾時不思
議光菩薩卽入其舍前至母所向所生母而說偈言

母無有過咎 應當自喜慶 是我本惡業

今生在母腹 母是我福田 哀愍所生恩

母勿生羞恥 速往如來所 母今得大利

腹懷妊我故 如是之功德 往問於導師

爾時不思議光菩薩語釋提桓因憍尸迦與我香華

衣服所須欲奉上母母當以是供養於佛當發阿耨

多羅三藐三菩提心爾時釋提桓因以天曼陀羅華

及以天香天諸衣服與彼菩薩爾時不思議光菩薩

復向其母而說偈言
受此適意華 天妙曼陀羅 妙香及衣服

奉上供釋仙 非飲食及寶 能報父母恩

引導向正法 便為供二親 供二足尊已

發淨上道心 我長夜常勸 常數數時勸

其母生喜心 畢竟不生恥 往詣人仙所

禮已在前住 華散如來上 奉華及衣服

佛所種善根 卽發菩提心 堅住菩提心

問於釋師子 懷妊淨衆生 願說是福報

汝以此善業 不生諸難趣 供多億佛已

當得成爲佛
爾時世尊於舍衛大城次第乞食已與不思議光菩

薩及諸大衆出王舍大城向祇陀林給孤窮精舍世
尊食已淨自澡漱而起就坐演說正法爾時憍薩羅
國波斯匿王聞不思議光菩薩嬰兒有大不可思議
神通聞已莊嚴四種兵衆向祇陀林給孤窮精舍詣
世尊所到已頂禮佛足却坐一面波斯匿王白世尊
言大德世尊不思議光菩薩嬰兒爲在何處聞有如
是不可思議神通之力時佛卽示波斯匿王不思議
光菩薩嬰兒時王見是不思議光菩薩嬰兒形色端
嚴殊特於天無所畏懼具戒定慧以自莊嚴如是見
已便作是念種何善根修集何福有是妙身爾時不
思議光嬰兒承佛神力知憍薩羅國王心之所念向
是大王而說偈言

常修慈心淨衆生	無麤穢惡修正念
攝身口意淨梵行	彼有如是淨妙身
遠離惡者不自造	增長修集無量善
捨離一切惡諍訟	彼有如是淨妙身
恭敬佛法及聖僧	常恒奉施衆妙供
不毀罵他不逼惱	彼有如是淨妙身
調弄呵罵及毀訾	於他人所不生是
歎美讚善不說惡	彼有如是淨妙身

怪貪嫉妬及僞慢
彼有如是淨妙身

諦觀已行不毀他

爾時波斯匿王白世尊言是不思議光菩薩嬰兒成
就如是勝妙大法有何業障而生於是姪女腹中捐
棄空處佛告大王乃往過去九十一劫爾時有佛號
毗婆尸出現於世如來應供正徧覺明行足善逝世
間解無上士調御丈夫天人師佛世尊大王當知爾
時毗婆尸如來法中有二菩薩一名賢天二名饒財
賢天菩薩於無上道得不退轉得陀羅尼及無礙辯
獲無生忍有福德威勢少欲少事常樂獨處逮得神

通彼時饒財菩薩習學頭陀爲賢天菩薩而作給使
彼人恒往聚落城邑多諸事務是賢天菩薩呵責教
誨何故多造是諸事務而不斷除數數教呵彼便生
瞋忿心不喜以忿恚故毀敗身心敗身心已瞋恚罵
言輕姪女兒私通所生從他人得不識其父又不識
母況汝當有戒聞定慧彼瞋罵已復不悔過又不捨
離結使所纏恒有忿心瞋賢天菩薩時賢天菩薩卽
便捨棄旣捨棄已倍生瞋恚罵詈揚惡以此不善業
行因緣身壞命終生姪女胎爲彼賢天菩薩所護不
生地獄姪女生已恒常棄之爲狐狼狗之所噉食大

王以是因故九十一劫常如是死生生常棄爲多人衆之所罵言是婬女子被棄空處狐狼狗食大王莫疑何以故彼時饒財瞋罵菩薩卽是今此不思議光菩薩是也惡業行盡以善業力淨於結心悅可佛意是人惡道悉皆永盡大王此不思議光菩薩已曾值遇六十四億佛恭敬供養尊重讚歎是諸佛所常修梵行勤進求法此本善力得如是事及神通力大王如是黑白之業終不敗亡是故智者善護身口及以意業寧捨身命不造惡業爾時波斯匿王自言世尊彼賢天菩薩爲已得成於一切智爲故修習菩薩行

耶佛言大王彼賢天菩薩今者在彼阿闍佛土修菩薩行名曰德藏爾時波斯匿王自言世尊若善男子善女人常應當親於善知識近善知識何以故世尊近善知識恭敬圍繞聽聞善法聞善法已得於善心已有善心則修善行造作善業趣向善處得善知識得善友故不作諸惡修習諸善習諸善已自無逼熱不逼熱他若有菩薩自護護他能得菩提若已住道有大勢力能有所利佛言善哉大王快說此言大王菩薩親近於善知識具滿一切功德善法爾時不思議光菩薩曰言世尊菩薩成就幾法疾得阿耨多羅

三藐三菩提獲淨法忍佛言嬰兒菩薩成就四法疾
得無上正真之道及淨法忍何等四解因緣忍遠離
斷常解無我人衆生壽命解了空寂修行於空是爲
四復有四法何等四過去寂滅未來無知現在不住
三世平等是爲四復有四法所謂自淨淨諸衆生淨
法淨禪定是爲四復有四法謂寂身寂心寂道寂法
是爲四復有四法謂以法觀佛不以色以離觀法不
以我以無爲觀僧不以衆淨於慧眼是爲四復有四
法所爲滿足諸波羅蜜不捨四攝法善知方便說無
衆生而行大悲是爲四嬰兒是爲菩薩成就四法疾

得阿耨多羅三藐三菩提及深法忍說是法時不思
議光菩薩得無生法忍歡喜踊躍上昇虛空高七多
羅樹時此三千大千世界六種震動大光普照天雨
衆華百千妓樂不鼓自鳴爾時世尊知不思議光菩
薩心已卽便微笑佛之常法若微笑時種種若千百
千色光從面門出青黃赤白紅玻瓈色是光普照徧
於無量無邊世界隱蔽魔宮及日月光斷除地獄餓
鬼苦已上至梵世還繞佛三匝從頂相入爾時大德
阿難從座而起偏袒右肩右膝著地合掌向佛說偈
問曰

色相甚微妙 雜好莊嚴身 圓光善答問
以何因緣笑 上戒行無畏 勝定慧莊嚴
示堅解脫果 以何因緣笑 忍力及十力
忍勇進難動 樂見示四諦 以何因緣笑
金剛身堅固 那羅延力盡 梵音聲悅意
願演說笑義 梵身天在上 不見如來頂
次第合掌敬 以何因緣笑 樹王下降魔
得無垢淨道 知諸衆生行 願顯何緣笑
轉無上法輪 說無常動地 調人天龍等
大德何故笑 照明除闇冥 無垢徧淨眼

功德如虛空 以何因緣笑

爾時世尊告阿難言汝今見是不思議光菩薩去地
七多羅樹住虛空不阿難白言已見世尊阿難是不
思議光菩薩過百千阿僧祇劫當得作佛亦號不思
議光出現於世如來應正徧覺明行足善逝世間解
無上士調御丈夫天人師佛世尊國名淨潔劫名無
咎阿難是淨潔佛土甚爲清淨如此他化自在諸天
宮殿彼佛壽命二十中劫大聲聞衆其數八萬諸菩
薩僧三萬二千阿難以何因緣故劫名無咎阿難彼
時多有百千劫中無佛出世是不思議光佛於彼劫

中最初成佛淨居諸天歡喜讚歎此劫無咎此劫無咎以有如來出現於世故是故當名此劫無咎說是不思議光菩薩時三萬二千衆生發阿耨多羅三藐三菩提心六萬菩薩得無生法忍五百比丘斷諸結漏心得自在成阿羅漢爾時佛告阿難汝受此經持讀誦說於大衆中廣敷演之令我正法久住在世亦多利益未來菩薩大德阿難白言世尊我已受持世尊此經何名云何受持佛言阿難此經名爲除淨業障亦名爲神力所持不思議光菩薩所說如是受持阿難若善男子善女人盡其壽命奉諸如來供養恭敬尊重讚歎以雜色華祴如須彌燒香秣香塗香幢旛寶蓋皆亦如是以用供養復有善男子善女人受持於此不思議光所說經法讀誦通利在大衆中廣爲人說如說修行是福多彼阿難若欲法供養如來欲作大智慧光明者應當受持讀誦此經佛說是經已不思議光菩薩大德阿難一切大衆人天龍鬼神乾闥婆阿修羅聞佛所說皆大歡喜

不思議光菩薩所說經

音釋

庠

似羊切

蹈

徒到切

鴟

具愚切

唼

所角切

舐

神紙切

也妊汝鵝切訾蔣氏切噉徒感切祴古得切衣

汝鵝切

蔣氏切

徒感切

古得切

衣

依邑釋于海曉

全助刻

寂念

賢樂

寂慈

寂賢

不思議光菩薩所說經

許字五千三百二十

二箇該銀二兩六錢六分一釐

姑蘇沙門契義對



崇禎四年孟夏月徑山化城寺識

超日明三昧經卷上

西晉清信士聶承遠譯

聞如是一時佛遊維耶離柰氏樹園與大比丘眾俱
比丘二萬八千菩薩八萬一切大聖神通已達悉得
總持攬十力慧住無所住超三脫門善權方便莫不
從化三達之智無所罣礙遊步三世獨尊無侶見生
死源本末所起應病授藥令各得所守護法城救濟
羣萌行四等心慈悲喜護四恩隨時開建橋梁布施
持戒忍辱精進一心智慧以度無極解空無相無願
之法得不起法忍現入眾生成無所起誨諸退轉令

不迴還八不思議拔度八難與法身合示現菩薩或
爲如來聲聞緣覺猶如日光無所不照徃來十方亦
無周旋觀一切法如化幻夢野馬影響悉無所有利
衰毀譽苦樂善惡永已滅除皆過世間諸所有法至
于道場等無增減其名曰普明菩薩普達菩薩普智
菩薩普慧菩薩普至菩薩光明菩薩光焰菩薩光等
菩薩光英菩薩光造菩薩慈光菩薩慈施菩薩慈戒
菩薩慈忍菩薩慈進菩薩慈寂菩薩慈智菩薩慈救
菩薩慈護菩薩慈雨菩薩慈明菩薩慈普菩薩如是
等上首八萬德皆如是爾時世尊與無央數百千之

衆眷屬圍繞而爲說經講大乘業無極之慧於是城
中有大長者名曰善寶與千人俱各各手執七寶之
華來詣佛所稽首佛足以其寶華共散佛上而各誓
願願使十方衆生之類心輒如華意淨若空如來威
神令諸寶華皆在空中於世尊上合成華蓋華蓋之
光普照十方諸佛國土國土菩薩諸天人民靡不覩
焉諸佛世界各有無數億百千菩薩來詣佛所稽首
畢一面坐於是慈普八萬大士與百億天帝釋梵王
與三十億梵諸天大神妙天與十億眷屬淨居天與
二十億侍從魔子導師與五十億支黨相隨俱來詣

佛歸命稽首足下退住一面阿闍世王與八萬人波斯匿王與五萬人維耶離王與諸尊者八萬四千人鬱禪王與二萬人悅頭檀王與九萬人拘美夷那竭王與六萬人如是諸王各將官屬不可復計俱來詣佛稽首于地退坐一面諸比丘比丘尼清信士清信女諸天龍神阿須倫迦留羅真陀羅摩睺勒人與非人無央數億不可譬喻來詣佛所稽首于地各各分部或坐或住佛在衆中威神特尊如日初出若星中月猶須彌山映于大海周照四域世尊放身光明巍巍聖慧無邊普照一切靡不蒙度四品瞻仰猶冥覩

明於時會中有菩薩名曰普明從座起整衣服長跪叉手以偈讚曰

大慈哀愍羣生 爲陰蓋盲冥者
開無目使視瞻 化未聞以道明
處世間如虛空 若蓮華不著水
心清淨超於彼 稽首禮無上尊
觀法本無所有 如野馬水月形
影響化幻芭蕉 曉三界亦如是
從無量難計劫 積功德不可數
慈心等定廣化 衆生類皆被荷

了三界其若夢

覺悉滅無適莫

生死五之本末

斯恍忽無所有

佛光明靡不照

威相好難計量

道巍巍無等倫

故稽首禮十方

本發意為十方

拯厄難濟黎庶

以獲願過於空

一切人冥不蒙

坐佛樹力降魔

逮無量覺道成

解諸法本自然

於異術無所求

眾上佛七寶華

在虛空成華蓋

光普照十方國

羣黎集受法誨

聖尊德踰須彌

智慧光超日月

所敷演不可踰

故稽首大聖雄

爾時普明說此偈讚佛已長跪叉手問曰唯然世尊

斯諸會者有發菩薩意或未發者有得不退轉或未

得者有得不起法忍一生補處道德成者或在五道

生死縛者如來加哀深為演現無極寶藏令未解達

心得燿然愚冥覩明得不退轉寧有三昧名普耀深

淺消散二法疾至無上正真道乎佛言善哉善哉普

明多所哀念多所安隱愍傷諸天及十方人各令得

所諦聽諦聽善思念之唯然世尊願樂欲聞佛言有

三昧名超日明菩薩逮得是者無所不入譬如日光
在所而現無所蔽礙化終始者使暢三處心意所爲
其未發意興菩薩心已發道心至不退轉立不廻還
至一生補處已得補處究竟無上正真之道等如虛
空無往無來不出不入無所不行行八十事乃諦逮
得斯定何等八十解眼空除耳聲無鼻艱拔言著濟
于識息貪婬休恚恨釋愚癡了色沫痛若泡想野馬
行芭蕉識猶幻心本淨意喻夢念同像不見身不計
人不有壽不保命四大空五陰無根六衰無源七識
無主行慈心哀一切志和悅護諸根無憎愛離衆對

不散行無合會無施不慳無戒不犯無忍不怒無進
不怠無寂不亂無智不愚不廢俗不專道講說法不
爲身爲一切無所著亦不斷亦無縛無所解行平等
却睡眠無諸蓋不受入不隨對心自解順佛教不違
法不輕衆愍十方人如父嚴教若母撫育譬于順親
恩如己身不自爲形不爲他人亦不爲法行菩薩道
弘持雅志不爲邪想無聲聞念無緣覺意不求妄想
棄彼此行一切無倚不見三世了三界本不心意識
解道若空離去來今深入大慧一切本無行大善權
佛語普明是爲八十行若遵修者則疾得至超日明

三昧譬如日出一時徧照百穀草木仰天之類莫不成熟逮斯定者等入一切上中下行無所不現而皆度之如月盛滿消夜窈冥以大定光進却三垢想蔽用除而覩上道如大醫王選擇百藥以療衆病各各得愈以無極慧隨衆本行而爲說法屏色痛想行識求使獲神通又如船師御牢堅船度人往還而無停滯示現泥洹濟無量人開化止處解三界空修至終始救攝群萌如雄師子隱于林藪諸獸懾伏獲斯定者開士獨步周旋三界六十二見九十六徑諸墮邪者皆爲降棄從受道教三品得所如轉輪王典領四

域天下戴仰斯定四等以四恩行分別四大度脫衆生生老病死我人受命使知本無得至大道猶若巨海悉受衆流包含諸寶竒妙異珍一切法門總持辯才諸定意門悉而歸之光演深邃無上慧義興隆三寶洗濯愚冥超至日明三昧尊定佛時頌曰

譬如日出時	其光悉徧照	百穀仰成熟
大定超於彼	等至於一切	雜行群萌類
普現無不周	莫不得過度	醫王療衆病
隨時而授藥	斯定應所宜	姪怒癡消除
船師度往還	從此到彼岸	菩薩亦如是

所濟無窮極	譬如雄師子	獨步無所畏
六十二疑見	斯定皆降化	若轉輪聖王
綏恤四天下	菩薩猶如斯	四等度群黎
巨海受萬川	瓊琦異珍寶	斯定包諸法
施以七大財	假使有發意	欲至無極慧
常尊斯定義	疾獲正真覺	

佛語普明菩薩有四事疾獲斯定何謂四愍傷群黎
 如已骨髓植衆德本不望其報觀四大空猶若如夢
 計五陰本則野馬也是爲四事佛時頌曰
 欲獲定意者 愍念衆生類 猶如已骨髓

立德不想報	觀身四大空	恍惚其若夢
計五陰本無	譬若如野馬	假使解慧者
則不見吾我	縷練一切源	速速斯定意

佛語普明菩薩有四事疾得斯定何等爲四愍育衆
 生愛若赤子常行慈心無有彼此勸誨愚癡示以道
 明晝夜精進志道無失是爲四佛時頌曰
 養護哀衆生 如父母愛子 大慈不勞望
 等心無適莫 勸化誘愚蠢 使覩大道明
 夙夜樂正法 乃能逮斯定

佛語普明菩薩有六事疾得斯定何等爲六布施平

等奉持禁戒一切無犯忍辱之力被大乘鎧精進勤
修未曾懈廢一心攝意使無衆想智慧明了不著三
界是爲六佛時頌曰

無施無所望 護戒若山地 忍辱立大力

則被大乘鎧 若修大精進 未曾有懈休

一心禪三昧 智慧無罣礙 不自覩緣變

所從興造立 三處忽現沒 一切無所住

佛語普明菩薩有十事疾得斯定何謂爲十施安於
人除諸穢害消化塵勞和合別離釋理邪見六十二
疑曉無吾我常崇十德欲濟一切三趣之難不爲外

術所見迷網從本無教無合無散是爲十事佛時頌
曰

施安悅衆生 離諸穢害想 消化於塵勞

和合亂別離 釋六十二見 曉了無吾我

常尊崇十德 欲濟拔三趣 矜愍諸八難

往來周旋者 猶若盲無目 不自覺沒冥

以故興大哀 救脫衆危厄 分別深遠慧

疾得斯定意

佛語普明菩薩有七事疾得斯定何等爲七心專志
道不爲他念於法自在分別空妙悅顏一心瞻察衆

生信知諸法無有根源常加精進不廢于道建立大
意志存永安將順護法至獲大定是為七事佛時頌
曰

策心專志道

未曾興他念

分別於空法

和顏向一切

曉了三脫門

解諸法無根

常修精進行

不廢於道教

建立大弘意

將養到永安

救護寤迷惑

得超日明定

佛語普明菩薩有十事法疾得斯定何等為十無我
無人無壽無命無聲聞無緣覺不處二法不著菩薩
不想見佛不在生死不處泥洹是為十佛時頌曰

不見吾我人

不計身壽命

無有聲聞心

蠲除緣覺想

不處法有二

無著於菩薩

不覩想佛身

不住有無際

燿然不自見

乃覩一切空

因緣不復起

乃得成定意

佛語普明菩薩有八事法疾得斯定何等為八等觀
邪正無有二心常念三寶令不斷絕講深法義未曾
言語業以大乘不樂弟子所造順法不捨佛道平正
方便除諸起滅因緣之想永已滅盡意止至寂不為
情亂一心定意覩見十方是為八佛時頌曰

等觀諸邪正

二俱無所處

常念於三寶

令慧不斷絕 演說深義要 未曾生他思想
 業以供大乘 不慕於小乘 所造常順法
 不釋佛正道 方便行平等 除諸起滅緣
 意止至寂寞 未曾興憤亂 一心存定意
 則觀十方佛

佛語普明菩薩有七事疾得斯定何等為七解色本
 空聲如呼響香若風等味猶緣合細滑何樂曉識如
 幻諸法喻夢是為七佛時頌曰

解色之本空 音聲猶呼響 鼻香因風氣
 細滑更則過 了諸識幻化 一切法則夢

能分別如是 得超日明定

佛語普明菩薩有五事疾得斯定何等五等心十方
 人與非人於供養利不以適莫若有講經後不宣闕
 不望他有財色之寶深入微妙難喻之法是為五佛
 時頌曰

等心於十方 人非人無異 若獲於供養
 其志無適莫 假使講經者 歎命不誦闕
 不望他財利 深入乃逮定

佛語普明菩薩有五事疾得斯定何等五過空無相
 不願諸法曉三達智辯才無量行大智慧度於無極

善權方便無所不入是爲五佛時頌曰

過空無相願 曉了三達智 辯才不可量

所說如大海 修行大智慧 所度於無極

善權皆周普 日明定如是

佛說是語時三十億菩薩皆不起法忍八萬四千人發無上正真道意三萬人遠塵離垢諸法眼淨八千比丘漏盡意解三千世界六返震動雨天華香筵簇樂器不鼓自鳴飛鳥禽獸皆來集聽十方菩薩自然飛來各擎諸華如須彌山用散佛上若干種衣被服珍寶供養世尊大聖難值如優曇鉢華時時可遇

斯法希有難以遭焉佛大神通從無數劫積功累德恢弘大哀布施持戒忍辱精進一心智慧善權方便皆爲黎庶自然獲之功不唐捐吾爲善利得見如來聞深妙法超日明定意快哉快哉何乃僥倖至如斯乎佛告諸菩薩審如所云實無一異信於深法能遵修者則當逮得超日明定意十慧之德何等十具足四等四恩無厭遵崇大慧普暢大定神通則達成就六度不起法忍善權方便見十方佛能領國土一生補處已逮道場三達之智是爲十說是語時無數菩薩得起法忍不可計人發無上正真道意爾時有

經

法華經卷上

十

知八

經

法華經卷上

十

知八

菩薩名離垢目白世尊曰何謂菩薩學何謂聲聞學
何謂緣覺學佛言無限無礙其心泰然是菩薩學有
限有礙其心褊局是聲聞學庶慕大乘進退無慧心
存中峙是緣覺學離垢目又問何謂無限何謂無礙
何謂泰然佛言發無上正真道意慈哀一切欲度跋
行喘息人物之類布施持戒忍辱精進一心智慧善
權方便但爲一切不念己身遵四等心慈悲喜護加
以四恩慧施仁愛利人等利一切救濟厄厄窮墮者
化之爲道而爲黠慧學菩薩道自省已過不察彼闕
敬人如父如母如子如身等無有異以身敬德敬一

切人以愛赤子愍一切人仇怨親友心無殊特解知
身空衆生無處吾我自然諸法自然道法自然佛法
自然一切本無無形無貌是謂無限於生死無求索
泥洹不見泥洹於泥洹無求索生死亦無所覩不惡
生死不住泥洹住無所住猶如日光徧照悉至亦無
往來光無想念菩薩如是普入一切亦無所入亦無
往反周旋之想譬如大海中有七寶明月之珠龍神
蛟蛇龜龜魚鼈悉容受之無憎無愛其水一味亦無
能穢菩薩如是現於生死三趣之難若至泥洹無爲
之界未曾增減心如明珠若喻淨水終不穢濁普濟

群黎入諸通慧平等之味以示衆生猶如空中生藥
樹毒樹其毒樹者不害虛空其藥樹者無所療除菩
薩如是若在生死三毒之中無所染穢假在泥洹清
淨之處亦無所淨俱度黎庶無所不濟雖曰有人亦
無出入往來周旋是謂無礙道心無限不有處所無
人無心亦不可得度衆生心如一切法如其趣此者
則趣平等其趣平等則等正覺無三界也無聲聞地
無緣覺處無菩薩住不處有爲不處無爲不有不無
亦無過去當來現在之處度無所度生無所生道跡
本無往來本無不還本無無著本無緣覺本無三界

本無衆生本無佛道本無無此本無乃真本無無所
適莫是謂其心泰然離垢目又問何謂爲限何謂爲
礙何謂其心褊局佛言畏惡生死三界之患言泥洹
第一不了自然獸身之苦憚無數劫周旋塵勞布施
持戒忍辱一心精進學智不倦頭目耳鼻髓腦肌肉
支體在所惠與不可稱限乃至于佛豫懷是心便却
不學菩薩法欲求滅身是謂爲限以得羅漢欲有所
度三昧禪思乃見人心不能豫觀一切根本不應病
授藥適欲久住觀察惡露不淨之體不以爲樂視如
讎賊如虺如毒早證泥洹是謂爲礙住于泥洹好明

惡冥不了諸法都無根本而求處所不知空慧是謂其心褊局離垢目又問佛言何謂中時佛言發菩薩意布施持戒忍辱精進一心智慧皆有妄想欲得世尊三十二相八十種好威神聖德與衆卓異不解本無如來之化示現身命反求謂有又謂有人欲度吾我不知本空行四等心四恩著行不至空見無爲因止不知進退不得空慧欲度衆生無權方便法身之明可以濟之是謂緣覺學說是語時無數千人皆發無上正覺道意於是長者子名曰淨教與五千群從來詣佛所稽首足下退坐一面又手白佛此諸群從

好樂佛法欲發道意積何等行得至道慧施行何法得攝佛土佛言有一法行而應道意何謂一心性調柔等向一切是爲一佛時頌曰

心性常調柔 志意不羸癯 平等攝一切

乃應菩薩行

復次又有二法爲菩薩行何謂二寂然心淨離諸著觀觀無所見唯志大道是爲二佛時頌曰

心淨常寂然 離見諸著觀 釋六十二疑

惟志大道行

又有三法爲菩薩行何謂三曉空不著無相不縛無

願不脫是為三佛時頌曰

心常曉了空 無相不復縛 無願無所脫
乃解三界結

又有四法為菩薩行何謂四常遵慈心無有害意長
養道化常修悲心愍傷眾生生死勤苦為之雨淚常
奉喜心和顏悅色向於群萌無憎愛心常行護心勸
教眾生使發道意以發道意至不退轉以不退轉至
於道場無上正真是為四佛時頌曰

常遵四等心 和顏意志悅 愍哀群生類
矜傷而雨淚 心欲度眾生 等心無憎愛

救護以道法 乃應菩薩行

又有五法為菩薩行何謂五奉於禁戒而無所犯定
意攝志令心憺怕智慧解空而無所起脫於五陰使
無處所示現三界觀無所有是為五佛時頌曰

持戒無所犯 三昧意不亂 智慧分別空
濟脫五陰聚 觀見三世厄 示現在其中
隨時而開化 各令得其所

又有六法為菩薩行何謂六目觀皆空耳聽無聲鼻
嗅無香口語無言身不存細滑心無思想是為六佛
時頌曰

目所觀皆空 耳聽無有聲 鼻香無所著

舌味無所有 計身但四大 心了本空事

如是曉無形 乃應菩薩行

又有七法為菩薩行何謂七攝身口心寂定無亂無所復違是為七佛時頌曰

常攝已身口 其心靜不亂 寂寞定三昧

神通無不達

又有八法為菩薩行何謂八施度無極戒度無極忍度無極進度無極寂度無極智度無極權度無極成明慧行是為八佛時頌曰

布施度無極 戒忍精進禪 智慧自然達

道明為最尊

又有九法為菩薩行何謂九除五陰去六衰滅三垢蠲八難不著三界不慕三世離羅漢心遠緣覺意常志大道是為九佛時頌曰

除五陰六衰 無三垢八難 不著於三界

三世無所處 以離羅漢心 無緣覺之念

常慕求大道 斯謂菩薩行

又有十法為菩薩行何謂十法寶三昧善住三昧無動三昧度無動三昧寶積華三昧日光曜三昧諸利

義三昧現在前三昧慧光曜三昧勇猛伏三昧超日
明三昧是爲十佛時頌曰

以法寶三昧 善住無所動 堅立不可震

寶積華三昧 光曜諸義利 現在慧光明

勇猛伏三昧 乃獲超日明

復次離垢目菩薩布施天人樂從開化慳者令無所
惜菩薩遵戒天人樂仰化放恣者令無殃疊菩薩忍
辱天人樂修化忿恚者令無纖介菩薩精進天人樂
隨化懈廢者令建勤劬菩薩一心天人樂習化憤擾
者令志安寂菩薩智慧天人樂順化蔽礙者令通聖

範菩薩行慈天人樂之化不仁者令等婉變菩薩行
悲天人樂之化愚迷者悼愍衆生菩薩喜悅天人樂
之化愁感者法鼓自娛菩薩行護天人樂之救化無
援將養一切菩薩講法天人樂聽化志俗者令慕聖
典菩薩謙若天人樂恭化貢高者奉敬三寶菩薩利
人天人樂慧化無義者令普施恩菩薩等攝天人樂
豫化不恢泰令接未達菩薩行權攝諸衆生化之爲
善成平等覺悉生彼國菩薩行三十七品之行以攝
衆生意止足斷根力覺道攝取衆生使令寂然若成
佛時悉生彼國菩薩在于大會講深妙法欲使蠕動

悉蒙超度若成佛時皆生彼國菩薩行十德以攝衆生悉以開化護身口意菩薩說經蠲除八難以攝衆生行八正道若成佛時皆生彼國菩薩自省不求彼闕以攝衆生離諸邪見六十二網若成佛時皆生彼國菩薩說法以攝衆生脫於八縛得至八解若成佛時皆生彼國菩薩說法除八思議至不思議法門之海若成佛時悉生彼國菩薩說法假使遠得無所從生法忍成具佛事示現泥洹度無量人皆使得道如是離垢目菩薩所行本末若斯以應此行號字自然成立國土度脫群黎佛說是時離垢目長者子五千

營從皆發無上正真道意尋時逮得不起法忍於時有居士名曰見正前白佛言我常聞佛思一奉觀罪蓋之故不能自到今日乃果欣踊難量視尊無厭聽法不倦惟加大恩使我世世值遇天尊佛言善哉善哉有四事法常不離佛何謂四常念如來立佛形像聞經深義則信奉行雖不見佛曉了本無知十方佛則一法身是爲四事不離諸佛又有四事雖面覩佛則不見之何謂四事如來現在不往聽經不採其義不能奉行不宣示人是爲四事雖面見佛則爲不見又有見佛自計吾我不解非常苦空非身墮四顛倒

聽經著音不能分別呼聲之響於其人身則滅度也
佛以滅度不現世間其人聞經欣然心開如冥覩明
曉知如來隨俗現化奉行道教不違經典離外邪法
六十二見行四等心無憎無愛佛雖滅度志達如是
常爲相見又復問曰何謂見佛何謂聞法何因供衆
佛言見如來身觀知何行得至於佛本因六度無極
愍傷一切如父如母如子如身不貪四大是爲見佛
聞說經法不著音聲但取其法不取於人取要不嚴
取慧不形取正不說是爲聞經若見道跡往來不還
無著緣覺世尊菩薩等心供養謙遜卑順不以僞慢

爲見聖衆又復問曰何謂魔事佛言魔有四事何謂
爲四一曰身魔身犯衆惡五陰六衰不順佛法二曰
欲塵魔愛欲情態無有休息三曰死魔生諸想著不
興法念四曰天魔及與官屬來試乞求無有厭足意
止意斷魔則降伏譬如兩木相指則自生火還燒其
木火不從風出不從水出不從地出其四魔者亦復
如是皆由心生不從外來譬如畫師畫作形像隨手
大小雖因緣合有彩有板有筆畫師不畫不能成像
四魔如是心以堅固便無所起則無四魔所以者何
五陰無處四大本無十二因緣無有端緒曉了如是

系
東晉三昧經卷一
八

經
星月三昧經卷一
八

則無魔事計我人壽命隨魔見縛分別無身乃降伏
魔離垢目白佛言何謂法寶三昧佛言不斷三寶佛
法聖衆何謂不斷發無上正真道意成就德本如須
彌山信樂大乘心不動移先覩嘉瑞三千佛土億百
千藏皆滿具足逮成殊勝難當總持而成就通達施
度無極初發心時捨身之安常憂一切諸樂所樂不
以爲樂離俗所慕以法爲樂何謂俗樂吾我人壽五
陰六衰十二因緣妓樂飲食官爵俸祿財物富貴妻
子奴婢眷屬營從田宅牛馬車乘衣被是俗所樂何
謂法樂曉知無我無人無壽無命五通六達十二部

經講讀諷誦菩薩道法於七法財不以爲歎四恩之
行行四等心慈悲喜護六度無極衆善之行無毀害
心歧行喘息人物之類以爲國土不自稱譽不毀諸
餘其心悽悽常在一切天神龍鬼人民大小覩斯人
者莫不興意而爲善德是謂法樂又行十事何謂十
信根第一定根爲本大慈爲緣大哀爲尊志性調柔
諸通慧正建立衆生四恩爲首道品則最志護佛法
以爲徒類是爲十復有十事不犯何謂十身不殺盜
姪口不妄言兩舌惡口綺語意不貪恚嫉癡邪見是
爲十愍十方人如母念子於色痛想行識不亂不爲

俗人所惑不爲榮貴所侮不從貪欲不從瞋恚不從
愚癡不謗三寶不懷譎詭興六念行念佛法衆施信
慧出入行步不尚矜高初發意者如月始生會當成
滿天龍鬼神所見擁護不爲邪惡所見中害心存三
法以道爲寶以世爲無常是爲法寶三昧

離垢目又問何謂善住三昧佛言譬若如地善惡好
醜美苦香臭不淨之物悉受不汗菩薩如是受一切
法而自修立先觀嘉瑞三千佛土平等如掌衆寶連
華以爲莊嚴逮成殊勝踰總持則具超越戒度無
極又行十事蠲八難態建立佛德度於聲聞緣覺之

乘淨身口意諸事所由皆從佛法莊嚴志性度三趣
厄具滿諸願檢御人心是爲十身常行慈不竊不姪
講議經典不爲浮譁至誠和靜言輒不麤未曾綺飾
捨貪念施爲人安調離於邪見好樂正法常觀非常
苦空非身以世爲穢以法爲計心自修立常患不及
視身無益五陰則損欲拔五欲佛道爲尊不懷悔恨
察天不常觀人如夢三塗最苦憐愍傷之以何方便
自濟生死五陰之難并化他人計十方人則爲我所
所以者何欲度脫之見來侵者不念其惡若光益者
不偏念善見罵詈者默而不報若撻捶者受而不校

若瞋恚者慈心向之若輕毀者哀而不害又自羞恥
從無數劫在生死中五行所蓋不能自拔迷心惑意
流於五江四懼之患不能自覺有物能施知財非常
身非我有求于善友遠離惡友發意向佛恒求尊經
不慕世名行常恭敬志於信戒聞施慧道不爲疑惑
犯禁懈怠慳貪愚癡捨道義也常思念法如飢求食
稍入於道如泉遠流轉入於海如母子乳哺養育
治生救命不居畜積供給父母兄弟妻子奴客婢使
皆念愍哀欲令得度不墮三塗使越三界歸命三尊
佛法聖衆獲三達智無礙之慧不爲三垢之所點汙

也行如是者則善住三昧也離垢目白佛言何謂無
動三昧佛言譬如師子諸獸之王衆獸畏威靡不懼
伏先覩嘉瑞三千佛土自見執持五兵勇猛逮成善
住總持則具超越忍度無極又有十事何謂十忍辱
爲本信悅爲力教一切人深妙法忍散割諸結除所
欲得不慕身源不惜壽命以諸通慧超三脫門觀法
平等是爲十護身口意常以諸法而興因緣何謂法
樂樂於佛法不好俗法樂聞經典不思世談樂供養
衆不爲俗黨但樂三寶不志三垢樂度三處不爲點
汙樂觀四大爲地水火風不計我許樂安人物不爲

危害樂施所有不爲慳恪樂奉禁戒不毀所尊樂忍
於辱不失德本樂精進力不爲罪根樂禪一心不爲
亂意樂深智慧不爲愚惑樂化塵勞不爲垢濁樂佛
國淨不厭開化樂嚴道法不爲非法樂三脫門離空
相願樂無爲法不樂爲俗樂入深法不爲失節志樂
欣喜離怒不諦樂自然法亦不捨人樂習善友遠世
親厚樂常志道不造迷惑樂講正義不爲俗典樂慕
菩薩不爲聲聞樂求正覺不爲緣覺樂向大道不爲
細術樂存八等不爲八邪樂六十二慧不爲自墮六
十二見樂無上法不爲下劣樂大乘業棄羅漢法是

爲法樂又有十事疾得定意何謂十事慈心哀人不
爲危害常行十善遠離惡行專心修道善念佛法如
飢求食如渴欲飲普尊深義不偏他念慈念十方欲
度一切不自念已是爲十所以名曰無動三昧之法
超越第一第二三昧之故不爲欲法之所迷惑奉行
菩薩慈心之法布施持戒忍辱精進一心智慧以救
衆生三趣之難稍習大慈欲濟三界視一切人如已
無異不爲他念常念法念以法爲本以俗爲罪常哀
群萌悉使至道是爲無動三昧離垢目白佛言何謂
度無動三昧佛言譬如自然鉤鎖力士勇猛力强多

所開闢獨步雄傑雄傑無侶除諸穢害塵勞離怨先
觀嘉瑞三千佛土四方四隅有大風來吹若干種華
普徧佛土分別速成難當總持則具超越進度無極
又有十事何謂十等精進根進力爲本平等方便意
志爲首令一切人不貪樂身而以心口順化衆生所
住不曲而無處所精進最上降伏怨憎勤修成就諸
通妙慧是爲十念四大身猶如蛇虺畏老病死不捨
終始不爲惑事慈悲喜護歧行喘息人物之類如父
如母如子如身等無差特常思道義無貪怒癡念爲
布施不爲慳想奉持禁戒無犯惡想爲忍辱念無瞋

恚想常修精進無懈怠想專精一心無亂意想智慧
行正無闇蔽想常求方便至心善權無放逸想念勸
化人如度已身一切所有非我之有念墮地獄者毒
痛之患如身自遭常省已過彼罪代受不以爲怨念
餓鬼趣飢渴窮乏之爲之悲泣戰慄寒心欲令度脫自
然安隱使服法食除五陰六衰之渴誦習經典以爲
飯食分別深義以爲飲漿修六法行以爲賢良出入
行步精進安詳念墮獸者常懷惻愴欲令安隱畢其
前債了故世罪無令造新奉行諸善不爲衆惡自觀
察已世世不了坐計吾我不信道法思犯罪者如沒

深淵奉法信戒心如虛空不解法者展轉五道猶如
車輪父母相憂兄弟相念夫婦相戀持心不堅本爲
父母反爲子女本爲子女反爲父母或爲夫妻更爲
怨家顛倒上下無常根本此菩薩意常慈念之開化
使信入佛正道信解非常苦空非身是爲度無動三
昧離垢目白佛言何謂寶積華三昧佛言譬如初利
天上晝度之樹以諸本行度於五根超越衆生心淨
如空先觀嘉瑞三千佛土衆音妓樂雜校瓔珞莊嚴
其身以思夷華光曜其體雨解脫及青蓮華侍在
其上則以是故諸德總持便爲受應禪度無極又有

十事何謂十調伏諸根以爲德本一心爲力平等方
便定意不亂禁戒爲元脫門爲上趣于定要而無所
有消殞塵勞具惟諸定是爲十愍哀五道攻除五陰
成立五根蠲化五色而已積德具足五品戒定慧解
度知見品志慕五通十力當蒙不與諸殃罪豐相遇
在在生處常修佛法名德遠著哀三界居不爲愚迷
了善惡趣譬如萬川歸向四流駛水之瀆此菩薩行
奉法如是精進不休遂得大道譬若如月十日之時
光明轉盛遂照衆星菩薩如是功德威曜日日增益
度諸危厄哀愍群黎之患又有五事行何等爲五五

戒清淨譬如明鏡無所點汙十善不犯以淨戒爲具
足不失道意不爲邪想不自貪身是爲五復有五事
除瞋恚色無怯弱心棄慳貪意蠲諛諂志分別解空
不但口說常修一心不爲亂行知世豪貴富樂如化
觀色如泡痛癢如沫想如芭蕉生死如影識若如幻
不爲色使不以痛癢惑不爲想還不爲邪行不爲識
退解五陰空是爲五復有五何等五貪婬瞋恚睡眠
調戲狐疑除斯五蓋徹視洞聽輕舉能飛知人心所
念自知所從來生死之處以五神通而自娛樂不以
五陰而爲放逸身修德行不爲非法開化說法多所

安隱不爲多患危害之事以道爲業習法爲食解味
爲飲不慕豪貴以法爲豪解空爲貴是爲寶積華三
昧離垢目白佛言何謂日光曜三昧佛言先覩嘉瑞
見三千佛土衆寶浴池八味之水湛滿且清植以青
蓮紅黃白華周帀欄楯皆用七寶與瑞華俱底布金
沙自身娛樂遊戲其中逮成慧定燈明總持則具超
越智度無極又有十事何謂爲十慧爲根源智力爲
上正見爲最等意爲勝修身諸德盡入諸種聖諦之
相爲平等相慧無陰蓋除諸往見不起法忍是爲十
事觀于六情本無處所無所從來無所從去本自然

空緣對而興譬如天雨不從龍出不從水出不從地
出不從龍心出皆因緣合乃致此兩六情諸入亦復
如斯猶因緣成不得獨立生死如是譬如畫師畫作
人像屋宇舍宅象馬車乘未畫作時不見處所工治
壁板素筆綵繪眾緣共合乃成之耳善惡如是因緣
合成若復行道因十善行六度無極布施持戒忍辱
精進一心智慧善權方便乃合成耳不著佛身不離
佛身心意無想自然如空稍入大慈又修大悲喜護
等行不自爲身當爲他人常爲一切亦不有求身行
謹勅口言謙順心念柔和無有諛諂質朴無邪又有

六事疾得無上正真之道何等六常依佛住入於正
道心不迴還於內意行而自曉了得善朋友因而委
付志願弘綽不以厭足心非不協不乏智慧是爲六
事菩薩行道不倚於俗不倚於色痛想行識不倚內
外隨本法教不違菩薩深妙之行不廢大慈不失大
悲隨世所乏而救濟之修道正誨不爲邪教一心向
慧不爲闇蔽分別六衰猶如幻化影響野馬水中之
月夢中所見忽不知處多所感動柔順法忍是爲日
光曜三昧離垢目白佛言何謂爲達成諸利義三昧
佛言先觀嘉瑞見三千佛土衆寶浴池察其左右度

地獄厄遊於曠野速成奇特聚落總持則具超越權
度無極又有十事權度無極何謂十入諸志行建立
衆生無極大慈普哀爲本心性調柔未曾厭倦捨於
弟子緣覺之乘所觀審諦導御道心以諸通慧立不
退轉覺了弘智是爲十事常以正慧遠離邪見自然
修道不爲俗惑深入微妙無極之法普入道俗於俗
不俗於道無倚思入聖教開化衆生老病死者常護
身事摧却六情不隨六衰不從七邪常攝七覺心了
不邪精進不廢順法不違好喜不恨信根不迷安隱
不危志定不亂信財信知本無戒財不墮小乘慚愧

財愧於三界未得度世羞恥財恥不弘慧博聞財聞
無等倫至深遠智布施財施以大道智慧財入於智
慧廣度無極又有十事至不退轉何謂十聞有度無
極心不動迴有佛無佛心不動迴有法無法心不動
迴有聖衆無聖衆心不動迴有道無道心不動迴有
菩薩無菩薩心不動迴有法身無法身心不動迴有
俗無俗心不動迴有人無人心不動迴有命無命心
不動迴有壽無壽心不動迴是爲十飛到十方教化
諸天及諸群萌以法爲本以道爲元不計吾我或入
地獄救濟苦痛或入禽獸開悟癡冥或入餓鬼慰滿

飢毒隨俗教化各得其所不爲俗法之所染汗淨如
日光明若月滿菩薩得不退轉能行權變有所開濟
輒多保度諸苦惱者皆獲大安諸無智者悉弘智謀
是爲逮成諸利義三昧離垢目白佛言何謂爲現在
諸佛目前立三昧佛言譬如月盛具足滿時衆冥皆
除喻諸所作精修清淨所願者具成立佛土教化衆
生先觀嘉瑞三千佛土師子鹿王首戴繒帛其身高
大威御雜獸逮成無上獲諸總持門八萬四千則具
超越以慧成就又有十事一心定意三昧無想無念
專志向佛衆如斷不爲諸求解法悉空不畏三界

不樂無爲不計有爲解知法身是爲十其所向方聞
現在佛常念彼方觀佛衆會四部弟子爲說經法察
四大空地如聚沫水如朝露火如虹電風如搖扇分
別四大因緣合成本無所有自觀身本察一切根本
悉無形貌自觀痛癢察一切痛癢知本無痛癢自觀
思想察一切思想知本無思想自觀其意察一切意
知本無意以觀已空見一切空愍哀八難釋世八事
利衰毀譽有名無名勤苦安隱捨于八邪不住八正
等處有無亦無所住行四等心慈悲喜護四恩濟衆
惠施仁愛饒益等利一心向佛無諸想念五陰則斷

六衰無處心則得定不見四大不見人民不覩天地
人物永無所見久久乃覩十方諸佛譬如水濁不見
其底停久不動洋而清澈菩薩如是適定無想獲無
所見五陰六衰燿如雲除日月光顯覩十方佛以復
觀之我至佛所佛爲來耶心自思惟佛亦不來我亦
不往譬如明鏡清水淨油觀形觀影不入不出菩薩
如是覩十方佛亦無往還譬如夢中歸本鄉里自見
父母兄弟妻子寤則不見菩薩如是見十方佛從三
昧悟都無所見所以者何解知本無三十二相八十
種好但化現耳無形無處譬如虛空不可別知何者

是空法身如斯無有處所乃能覩達一切之源坐覩
十方亦不去來是爲現在諸佛立目前三昧離垢日
復白佛言何謂爲慧光曜三昧佛言先覩嘉瑞三千
佛土轉輪聖王造法王教無量君臣相輔百千眷屬
營從於虛空中執諸寶華持覆其身逮成無盡行總
持門六十萬姪諸總持慧則具超越教化衆生譬如
明月神珠令諸窮匱周滿所僥具足諸法訓誨群萌
隨一切人而應施與無盡德藏又有十事何謂爲十
以法布施戒攝不順忍攝強暴進攝慢怠一心攝亂
慧攝邪智善權隨時化以大乘闡弘大道遊於八難

度脫八邪等心一切無偏頗行是爲十住八不思議
不捨菩薩觀於三界若如幻化不以爲實自忖何來
去至何所不見去來隨行所住各自成譬如野馬
夏行曠野無人之處遙見大河水流駛疾其傍生樹
若干種果而甚茂盛其人飢渴旣熱疲勞不可復言
欲往趣之覩之如近走有里數都不見水乃解野馬
無有水也達者頻覩則知無水不走趣求衆生不了
三界如幻化者計吾我人有壽命聞佛說經一切無
常乃思覺之不復爲惑菩薩解知一切衆生處三界
者如化如幻如影野馬如夢水月悉知本無無著無

縛無脫一切無求猶如慈母養活諸子菩薩如是開
化一切亦無所置譬如導師多將賈人歸本鄉里不
逢惡賊安隱到家菩薩如是以慧光曜三昧之定携
接一切祛姪怒癡三毒之冥開示三乘大乘爲本各
令得所譬如醫王見衆生疾應病授藥諸破病者莫
不消除菩薩如是以慧光曜三昧普見群萌五道之
患三毒酷苦以大慈悲而開化之令奉正教無極之
慧發未發者堅進不轉迴者昇一生補處至無上正
真之道是爲慧光曜三昧之定也

超日明三昧經卷上

慧發未發持望野不轉毘林長一坐斷滅至毗土五
患三毒都苦以大慈悲而開升之令奉五於無刺之
不尚刹善勤收具以慧次觀三相普良觀苗正識之
今升也警收醫王良來土來惠再對藥前所祿皆莫
此一以慈致慈樂三毒之真開示三乘大乘為本各
參惡煥安觀匠室善勤收具以慧次觀三相之象數
升一以在無視置警收學相空雜買人觀本觀里不
除難知一以無才餘收慈母養故諸子善勤收具開

超日明三昧經卷下

西晉清信士聶承遠譯

離垢目白佛言何謂勇猛伏三昧佛言譬如轉輪王
功祚無量威德巍巍而得自在於一切法得無盡慧
方之虛空無垢清淨先觀嘉瑞三千佛土如來形容
紫磨金顏其光方圓與無數梵億百那術而為說經
逮成無量行總持門恒沙百千姪總持行則具超越
聖智具足多所成就又有十事何謂十志一切智無
所適莫不住有為不住無為行普慈心等于衆生行
大悲心等若虛空無弟子念無菩薩想亦無俗志亦

經 一
走日明三昧經卷下
無道意常以大慧順化群黎入一切生亦無所生現
諸佛土不捨法身等心吾我及與泥洹是爲十事不
以身口有所言行心常定安不增不減現于欲界度
諸欲塵於欲自然亦無所著一切無求譬如蓮華不
著塵水現於色界於色自然無求無望譬如麻油不
與水合觀色無色自察本無亦無所察現無色界無
色自然無後無前譬如火焰不燒虛空亦無增損不
來不去無去來處獨步三界已越三處譬如飛鳥飛
行虛空無所罣礙濟脫三界各隨本志使疾開解得
至大乘譬如醫王持若干藥各隨應病而令服食風

寒熱病卽便療愈菩薩如是以佛法藥療治姪怒癡
病使無有餘其心清淨無形無名猶如猛健大軍之
主攻討惡逆菩薩如是以大慈悲開化衆生諸周旋
者闇昧之人六十二見諸邪狐疑墮羅網者及六十
二諸非正法皆令發意自遵六度大慈大悲衆行之
要使至大乘譬如船師御堅牢船通度往還一切黎
庶各隨彼此菩薩如是以勇猛伏三昧之定度脫無
數生死之惱於聲聞現隨心開化於緣覺現從本誨
授示現佛身開三道教或現大法無極之慧大乘深
法無三惡道亦無三乘譬如幻師於大衆中自現身

死火燒獸食衆人恐怖各各求哀大餽遺之欲令復
身知得實多便從地起亦復如故亦不有死亦無起
活菩薩如是開化衆生生死五道或發菩薩或爲聲
聞或爲緣覺或生天上忽現泥洹衆人啼哭謂以滅
盡忽現他方緣覺聲聞亦復如是謂以滅度無所復
有如火滅亦無處所則歸本無菩薩雖現泥洹與
法身合亦無往來還復示現隨衆化度菩薩大士乃
達之耳解知法身譬如日照現于水中乃至郡國縣
邑丘聚村落日殿不行亦不轉移在於人間而明悉
至不去不來菩薩如是現于三界亦不往返周旋也

度脫一切亦無所度是爲勇猛伏三昧也離垢目復
白佛言何謂超日明三昧佛言其明無量不可譬喻
過於日光所以者何日之光明照現在事人物蠕動
百穀藥木諸天龍神皆因日成普得茂活日不能照
二鐵圍間亦不能照人心之本令開達也但照有形
不照無形超日明三昧所以勝者何殊照十方無邊
無際三界五道靡不徹暢菩薩大乘照于聲聞緣覺
之乘九十六徑六十二見邪疑結冥使心燿然普發
道意業三乘者各得成就或得生天或得人身無不
普蒙如忉利天處須彌頂天帝釋宮紫紺寶殿炳然

在上中四天王下四方域諸天人民餓鬼魔鬼諸神
闍叉超日明三昧亦復如是心堅不動如須彌山主
化五道天王帝釋化生老病死瘵諸不孝姪怒癡垢
使發道意釋小乘志大乘發意受決得忍受決未發
意受決行六度無極悉無有妄想不覺受決超日明
三昧甚深甚深難可稱量無有涯底譬如虚空假使
有人欲量虚空升合斗斛多少之限空尚可量盡知
其升數超日明定慧不可稱量譬神足人度空十里
百里千里萬里億里億萬里無央數億百那術里空
尚可盡究其邊際超日明定慧殊於彼無央數億億

倍而復倍無能限量造譬喻者所比道明無遠無近
無廣無狹離垢目問世尊曰大聖嗟歎當言極廣甚
大長遠何謂無遠無近無廣無狹佛言有狹之故因
曰有廣有近之故因曰言遠無遠無近無廣無狹無
可方比假喻譬之欲使人解無有邊際如空無際超
出其外微塵無色開入其裏無復計校引喻了義至
大道慧無有譬也過諸聲聞緣覺菩薩乃至無上正
真之道正覺爲上爲尊爲無儔匹爲無等倫自然之
法無有作者亦無不造無來無去虛無自然曉了一
切本無曉了一切本末以了諸本亦無所倚亦無不

倚自然之慧皆別了之三界自然三界自然人物自然人物自然生死自然生死自然本無自然本無自然佛道自然解分別斯一切自然解分別斯一切自然乃能逮得超日明定普濟三世至無極慧是爲超日明三昧於是有長者女名曰慧施與五百女人俱來詣佛所前稽首佛足却坐一面聞佛說斯超日明定喜踊無量前白佛言我今女身願發無上正真道意欲轉女像疾成正覺度脫十方有一比丘名曰上度謂慧施曰不可以女身得成佛道所以者何女人有三事隔五事礙何謂三少制父母出嫁制夫不得

自由長大難子是謂三何謂五礙一曰女人不得作天帝釋所以者何勇猛少欲乃得爲男雜惡多態故爲女人不得作天帝二曰不得作梵天所以者何奉清淨行無有垢汙修四等心若遵四禪乃升梵天婬恣無節故爲女人不得作梵天三曰不得作魔天所以者何十善具足尊敬三寶孝奉二親謙順長年乃得魔天輕慢不順毀失正教故爲女人不得作魔天四曰不得作轉輪聖王所以者何行菩薩道慈愍群萌奉養三尊先聖師父乃得作轉輪聖王主四天下教化人民普行十善遵崇道德爲法王教愿態八十

四無有淨行故爲女人不得作聖帝五曰女人不得作佛所以者何行菩薩心愍念一切大慈大悲被大乘鎧消五陰化六衰廣六度了深慧行空無相願越三脫門解無我無人無壽無命曉了本無不起法忍分別一切如幻如化如夢如影芭蕉聚沫野馬電焰水中之月五處本無無三趣想乃得成佛而著色欲情淖態慝身口意異故爲女人不得作佛此五事者皆有本末是爲五礙時慧施女報上度曰各植諸本用獲果實本有男女及報應耶本有五處釋梵魔天轉輪聖帝大道小道乎上度答曰無也慧施問曰設

使本無何因而有答曰因行而成慧施報曰譬如畫師治壁板素和合彩具因模作像分布彩色從意則成五道如是本無處所隨行而成譬如幻師化作日月帝釋梵天轉輪聖王天龍鬼神人民禽獸隨意則現慌忽之間則不知處生死如是本無所有從心所行各各成形至於如來無幻無化無合無散亦無處所乃至佛耳所以者何五戒爲人十善生天慳墮餓鬼觚突畜生惡墜地獄行四等心不懈空行生于梵天倚空求度散心著空生無想天六度無極之想不離三界畏苦厭身惡生死難志存泥洹故墮羅漢發

菩薩意欲度一切不解本無著佛身相欲疾得佛不
得善師不了善權便中道止得緣覺道斯之所行有
合有散則不得成無上正真道也一切無相何有男
女上度又問以何等德行而成正覺慧施報曰不生
色行不觀不空行不滅色行不捨執行亦無造行不
生識行不觀不空行不滅識行不色生行不識生行
亦無歸行無來無去永無處所無所住行不倚三界
不捨五陰不受五陰不捨俗行不想道行是爲行道
得至正覺不倚四等不想六度無極之行不於三脫
有所倚行達空無相無願之法乃爲菩薩應順法行

不違正覺平等之行如是上度行斯法者寧有方面
處所三界男女乎答曰無也尚無造者何所成立以
是之故吾寧佛者有何難耶取無所取成無所成覺
無所覺無取無捨乃號爲佛亦無名號假有字耳佛
言善哉善哉慧施誠如所云一切無處隨行而成不
合不散不興不衰無見無聞無念無知無言無說乃
成正覺於時慧施則轉女身化成男子踊在空中從
上來下稽首佛足得不起法忍時五百女人欣然踊
躍以偈頌曰

本每自觀察 謂男有常種 強弱各有品

女固不得移	今日蒙佛恩	乃知無堅固
五道如幻化	隨行而各成	三界爲心造
不了本無諦	自計有吾我	縛著墮汗泥
譬如捕魚工	以鉤釣取魚	非自己所有
自謂我應獲	三界如寄居	四大非我所
解諸法如夢	則無有取捨	惟佛見如哀
恩慈垂覆蓋	令轉女人身	值超日明定
得佛成國土	教化諸天人	衆生皆度脫
疾獲無上真		

佛告五百女當如所願疾獲爾志諸女欣然即成男

子於是佛授慧施及五百女決却後十劫皆當爲佛
 名曰慧見如來至真等正覺明行成爲善逝世間解
 無上士道法御天人師號佛世尊世界曰除冥劫曰
 光明佛住百億萬歲說法恒沙菩薩得不起法忍一
 生補處亦復如是諸阿羅漢不可稱計爾時人民被
 服飲食當如第二忉利天上時諸衆會聞佛授決滿
 百千人皆發無上正真道意無數菩薩得不起法忍
 八萬比丘漏盡意解十萬天人遠塵離垢諸法眼生
 地即大動空中散華其墮如雨箜篌樂器不鼓自鳴
 億百諸天於虛空中皆歎頌曰甚哉深法難值難聞

偉哉吾等宿有餘福今乃值聞何其快哉佛復告慧
施人在世間生死之縛但用不解深法要故計吾我
人猶如猩猩誘誑以酒知不能釋爲人所獲世人若
茲綢繆五陰六衰之患恒計吾我不知苦空無我非
身犯則有殃不自抑制而爲三毒五蓋所縛不得解
脫反真諦道如木生火不覺自燒不了空行計吾我
人亦復如是自誤墮冥入三惡道譬如劇賊劫抄寇
害自謂健快俗人著色痛想行識沒溺穢垢罪蔽陰
蓋不解大法殊妙深義有癡恩愛則生爲人十二結
縛六十二見癡網遮羅迷惑諸邪九十六徑研精諸

法分別空無如幻如化如夢芭蕉野馬水月呼聲之
響不計吾我知色自然痛想行識自然痛想行識自
然四大自然四大自然三界自然三界自然泥洹自
然泥洹自然乃得無所從生法忍不在生死不處滅
度則應大乘深妙之慧譬如有人體得重疾欲自療
治當服順藥反服毒藥謂攻身病害腹傷臟不卽更
服除毒之散尋能殺人悔無所及學道之士亦復如
是本發道意爲菩薩行奉四等心慈悲喜護遵行六
度而皆有想有所求望便墮聲聞緣覺之乘假使適
成不樂因出得志大乘躊躇不了便住中者卽墮小

乘譬如庶人之食如是轉輪聖王食之爲毒藥也譬
如甘露上味是藥多所療治衆人之病菩薩如是以
大乘法多所療治於一切人生老病死姪怒癡厄衆
想之患佛說是時千天人發無上正真道意五百天
子得不起法忍於是菩薩名曰慧英問文殊師利
何謂菩薩博聞多智文殊師利答曰從無央數恒河
沙等劫積累功德不以爲厭聞四等心亦不厭足修
四恩法亦不厭足行六度無極亦不厭足空無相無
願亦不厭足大慈大悲亦不厭足進五神通亦不厭
足教化衆生亦不厭足爲大乘教亦不厭足現聲聞

緣覺普化一切亦不厭足示現泥洹住泥洹中還生
死界亦不厭足不來不去無所不至譬如虛空無所
不至不出不入無所不達無所不徧是故名曰博聞
多智不以過去爲計數不以當來有限礙不以現在
有處所無去來今三世之限於三塗等無三界想無
泥洹念無道無俗不附不捨是者乃謂博聞多智於
所聞亦無所聞於所見亦無所見於所言亦無所言
於所度亦無所度是故乃謂博聞多智慧莫又問何
謂行者何謂成就答曰發菩薩意行四等心大慈大
悲無極之慧布施攝人戒忍精進一心智慧以救衆

生行稍漸進是謂行者行過於空無相無願不見吾
我不覩三世不見泥洹及與生死是謂成就慧英菩
薩又問佛言人生從何所來去至何所老病死何所
從來去何所至色痛想行識從何所來去至何所地
水火風空眼耳鼻舌身心本從何所來去何所至佛
言皆無所從來去無所至緣合則有緣離則滅如幻
如化如畫如鼓如雨如電皆從因緣有緣有生無緣
無對生死如是等無有異也慧英又問何謂無所從
來無所從去因緣合成佛言作人行者則得爲人作
天行者則得爲天作地獄行則入地獄作畜生行則

受畜生作餓鬼行則爲餓鬼無五行則無五道無五
道已則無出入名曰人本無有三界欲界色界無色
界無心意識故無三界名之人本未有人物有色無
見何謂有色無見地色水色火色風色定者謂地清
者謂水明者謂火攝者謂風天地未然未有三界是
四色者而常自然無有作者自然動起惟道能名乃
至補處能名斯者無像之像亦曰心色阿惟越致見
心色阿惟顏見四色心如來見未有四色之心本也
於三界中而不然者是爲心色名曰心本故曰非不
然於菩薩法故曰爲然無心色志三界自然自然如

空乃名曰道於是諸法無合無散所以者何假使合者則人本也假使散者則生死也見生死苦泥洹之樂則名聲聞處在中間無益一切名曰緣覺無合無散不處泥洹不得生死乃名之曰法身法身無形普入一切亦無所入無所不入佛說是語時五千人得無所從生法忍無央數人皆發無上正真道意於是阿難問世尊曰欲發道意爲菩薩者以何爲本佛言當精進不懈分別空慧欲度一切不見吾我及與壽命是則爲本又復問曰寧有遲疾佛言亦有亦無又問何謂亦有亦無佛言有者從進不忘積植功德

布施持戒忍辱精進一心智慧善權方便慈悲喜護四恩空行得致無上正真之道不從放逸懈慢而得斯謂有也無者道無處所無形無名譬如虛空不從造作而可獲也無所造作無心意識無內無外亦無中間無取無捨乃應入道斯謂無所入所以者何乃往歷劫數難計會有轉輪王名曰自在王有千子勇猛傑異國典七寶主四天下治以正法不加刑罰爾時有佛號曰寶妙如來至真等正覺明行足爲善逝世間解無上士道法御天人師號佛世尊時佛說法初語亦善中語亦善竟語亦善分別其義微妙具足

淨修梵行所演弘普時會菩薩無數億衆聲聞緣覺不可稱限時轉輪王供養侍佛積有年歲千子寶臣大衆翼從俱詣佛所稽首足下却一面坐佛爲廣說菩薩之行多所安隱多所救護於一切人爲第一尊王及諸子寶臣翼從之衆皆發無上正真道意夙夜精進不敢倦怠供養如來一切所安於是千子悉於佛前自試功德各各探策誰前作佛得上策者餘降不如次第作佛懈怠薄德最當在後尋如所言各各探策有一太子最後得策窮久下第乃得作佛則時愁感不能自勝便自投身如太山崩吾身云何最後

作佛佛告之曰勿得憂感道無有限亦無遠近能分別解了空無之慧便在前耳於時太子聞佛所說卽時踊躍尋發無上正真道意得不起法忍行大慈大悲解一切法如幻如化影響如野馬夢芭蕉水中之月千人之中第四作佛號曰釋迦文如來至真等正覺其餘諸子次第得佛最後當作佛者名曰樓由佛語阿難欲知爾時轉輪聖王者錠光如來是也失策太子便解空無精進不懈先得佛者則吾是也其餘諸子斯賢劫中千佛興者是也當知斯義道無遠近解空別妙知自然法乃得佛疾爾時諸會莫不欣然

普發弘願爲菩薩行五千菩薩遠得起法忍萬人
得柔順法忍於是日天王與無央數百千天人來詣
佛所稽首佛足下却住一面前白佛言以何等行爲
日天王行照四天下何緣爲月照夜除冥佛告日王
有四事法得爲日王何謂爲四常喜布施修身慎行
奉戒不犯又志然燈於佛寺廟若於父母沙門道人
植光明德是爲四佛時頌曰

常樂興布施 奉戒不犯禁 然燈於佛寺

若於父母前 好喜佛正典 不誹謗經法

敬沙門道士 因斯得爲日 身出千光明

普照四天下 諸窈冥之處 莫不蒙暉曜

佛告日王又有十事爲日天王何謂十身不殺盜淫
口不兩舌惡口妄言綺語意不恚嫉癡是爲十佛時
頌曰

恭已自攝護 而不殺盜淫 不兩舌惡口

妄言及綺語 心不懷嫉妬 無瞋恚毒害

離六十二見 日光照四方

佛告日王又有四事得爲月王何謂爲四布施貧賈
奉持五戒遵敬三尊冥設錠光君父師寺是爲四佛
時頌曰

布施諸貧賈 常奉持五戒 然燈於佛寺
 恭敬侍三寶 心存念諸善 蠲却世諸惡
 自護身口意 得月光照冥
 於時曰天王白佛言惟願大聖枉屈尊神到宮小食
 今諸導御虛空神天皆蒙大恩聞深妙法悉發道意
 所度無量時佛默然已受其請曰王見佛已許就請
 繞佛三匝忽然還宮辦百種食若干甘美牀榻坐具
 校飾鮮潔爲佛敷座高四千里於是曰王住於宮殿
 遙重請佛傾悚息以頌讚曰
 布施於一切 所有無所恪 亦不望相報

得佛度十方 智慧如虛空 所化無量礙
 一切皆蒙恩 時到惟屈尊 慈心加衆生
 未曾懷危害 悲哀未度者 施誨以法寶
 威神照群黎 救脫貧賈路 惠以七寶財
 時到惟屈神 觀衆生迷惑 五道之苦勤
 常以加大哀 慰免諸恐懼 開化以法教
 示道諸不及 種至空無慧 時到惟屈神
 其光踰日月 威德超須彌 智慧超虛空
 雙比不可喻 日月照衆冥 但能成萬物
 佛照五道人 悉令獲五眼 虛空尚可度

海水知幾滴 須彌十方地 亦可知斤兩

如來智慧聖 功祚弘巍巍 無限普超彼

時到願屈神

爾時世尊告大衆會時至悉嚴就日王請則皆受教
佛與大衆涌在虛空至日王官坐師子之牀衆會坐
畢王后太子諸天眷屬稽首于地卽以至心供養世
尊手自斟酌百種之饌飯訖澡畢更取卑牀自坐佛
前恭肅聽法佛告日王一切三界所受形貌皆從心
心意無形而有所造隨行立身豪貴貧賤皆歸無
常如泡起頃尋復滅壞一切世間所有如是當信道

德正真可怙餘不可恃棄捐衆行奉行法行何謂法
行無生之行除諸所生真諦之行所存殊勝入道之
行無所忘失布施之行無所榮冀持戒之行普得諸
願忍辱之行不亂衆人精進之行未曾動轉一心之
行意行常達智慧之行以聖眼觀慈心之行忍一切
苦悲心之行等意衆生喜心之行以法開化護心之
行安慰一切神通之行六通已達惟空之行無患害
心消滅之行度諸群黎四恩之行合聚教人博聞之
行從受成道不起之行而觀自然道品之行不獲有
爲本無之行無罪福報緣起之行了知無明明不可

盡衆勞之行解人物自然諸法之行了空之慧得平等覺伏魔之行無能傾動三界之場雖處不墮師子之行善勝無畏力無懼行所向無畏三達之行無有罣礙一心覺場大智普具敎一切行無所不周化六十二見行濟衆生羅網九十六徑誨入一道如是曰王菩薩以應斯行則順道行以順道行則應大慈以順大慈則應大悲以順大悲則應大鎧以順大鎧則師子吼以師子吼則應化幻以順化幻則入五陰以順五陰則隨時入以隨時入無所不變以在所變無去無來度無所度淨無所淨明無所明覺無所覺乃

爲正覺佛告曰王欲達去來今現在事十方諸佛法身平等常當信樂分別此義欲知生死十二因緣從所興發三趣之患五蓋之覆當解此義信奉行之欲了十二部經典之要開三達敎越于三脫至三達智當解斯義猶郡國縣邑丘聚村落百穀草木藥果之樹皆因地生菩薩入斯慧無所不化皆成立之至于無上正真之道聲聞緣覺皆依因之佛說是時曰天王皇后太子眷屬諸天其心自然皆得不起法忍十億天人發無上正真之道爾時世尊卽從座起而立空中與無央數百千之衆釋梵四王諸天翼從而歎

頌曰

天人不解了 從來難計量 迷惑於五趣
如魚著鈎餌 三界猶如夢 恍惚不見處
生者不自覺 爲意識所使 墮于四顛倒
甚可愍哀憐 自計身有常 不信于道真
一切從空生 反惡聞空慧 如人從親生
更不孝父母 羴者化爲虎 不覺爲人時
尋還害家中 不別其親疎 人本從空出
憎無亦如是 迷亂於陰入 猶醉者裸馳
羴復變爲人 乃識家親屬 以分別本無

乃解一切空 空者不念空 空亦不見空
以達無所生 乃能解自然 欲求菩薩行
度脫衆生類 當了一切法 自然如化幻
分別思慧已 周旋不以難 則入深妙法
權慧開導人

佛說是時無數億天虛空諸天皆發無上正真道意
不可計菩薩得不起法忍佛還維耶離柰氏樹園爾
時城中有大長者名曰解法供養先佛無數百千植
衆德本不可稱限稽首諸佛禮敬難量諮受法言於
無上正真之道志不退轉不起法忍出於智慧所度

無極善權所濟不可計議與眷屬俱來詣佛所稽首
畢一面坐叉手白佛供養世尊得何功德佛告長者
奉華散佛所生端正衣食自然燒香氣熏身體香潔
名德遠聞其然燈者天眼明慧不處窳冥旃綵施者
在在富樂財寶無限上繒蓋者致得屋宅覆蓋不露
音樂倡妓樂佛塔寺得天耳聰履屣車乘施者得輕
舉能飛一心向佛得知宿命慈察衆生知一切心以
法施與得諸漏盡以食施與常值法會以衣施與得
三十二相八十種好我滅度後其有供養形像舍利
德皆如是稍稍順法因斯得度無爲之道也解法長

者復白佛言寧有供養殊過於斯華香旛蓋妓樂屣
乘飲食衣服者乎佛言有又問何所是佛言發菩薩
意哀念一切終始之患欲令濟度大慈大悲不厭生
死求諸總持三藏之篋優深難量無極之慧平夷三
塗導以三寶分別於空無相無願起三脫門得三達
智觀人根本本無處所因緣而生觀一切法亦無去
來六情自然如水沫四諦無諦譬如野馬了本無
已乃爲正諦慈悲喜護布施以法仁愛衆生勸益群
黎等利一切六度無極善權方便隨順而化不惡生
死又如飛鳥飛行空中樂乎終始譬如華果苑園流

泉戲廬不違大聖真妙之誨不畏四魔降伏衆邪六十二見化發九十六種之道諸徑之惑捨聲聞緣覺之行知無我無人無壽無命遵修正真無上大道斯供最勝自觀己身如幻化耳十二因緣了無端緒所以者何本無有癡緣對而興從癡致行從行至識從識致名色從名色致六入從六入致觸從觸致痛從痛致愛從愛致取從取致有從有致生從生致死從死致憂感悲感不可意惱了知本無尚無有癡何有行識名色六入觸痛愛取有生老死憂悲之患永無有也諸緣悉除不住三界不樂泥洹無大道想無小

道想遊生死譬如日明不出不入於世間人有出有入菩薩如是開化一切現生三界說三乘教便現滅度於一切人見諸生滅於菩薩法無有生滅是供養者最爲殊勝爲尊爲上無極無底之供養也佛說是時十萬天人皆發無上正真道意解法長者及諸眷屬立不退轉不起法忍於是調意菩薩白佛言何謂爲調何謂爲寶佛言若得罵詈擗捶呪詛心無有異毀辱輕慢侮唾賤心無有異若稱譽恭敬宣揚功德心無有異若稽首歸命跪拜尊敬心無有異設以天福轉輪聖王愛欲之樂以勸示之心無有異假

以地獄餓鬼畜生災怪恐逼心無有異知命非常苦
空非身示以動之心無有異若以聲聞緣覺之法用
誘進之心無有異假以菩薩空無之慧大乘化之心
無有異是則謂調何謂爲寶佛言發菩薩心欲度一
切斯則寶也尊敬於佛不隨外道斯卽寶也解經順
教不逆大化斯卽寶也謙敬衆僧有及聖衆斯卽寶
也布施一切無所希望斯卽寶也奉戒慎禁發菩薩
願斯卽寶也忍辱之力伏意不亂斯卽寶也精進恪
勤修道務本斯卽寶也一心行定正不邪迷斯卽寶
也智慧幽微不隨六情斯卽寶也善權方便各得其

所私卽寶也慈心弘普志不纖介斯卽寶也常懷悲
愍矜哀危厄斯卽寶也安和悅喜不欣不戚斯卽寶
也擁護一切無不救度斯卽寶也以法施與不道不
俗斯卽寶也撫育衆生無所愛惡斯卽寶也務存長
益無所損耗斯卽寶也等利群黎無偏邪意斯卽寶
也常執謙忠未嘗慢恣斯卽寶也若有罵詈而無結
恨斯卽寶也假使搥捶計若無身斯卽寶也設使怒
害以仁惻報斯卽寶也如令輕易不念其惡斯卽寶
也解知非身不計吾我斯卽寶也了一切苦不樂放
逸斯卽寶也物非我有無所眩惑斯卽寶也捨聲聞

行不爲緣覺斯卽寶也修尚神化于五至六斯卽寶也釋六十二不墮邪見斯卽寶也不安泥洹不危生死斯卽寶也常以大法開化未聞斯卽寶也爲一切人示現法橋救攝諸厄斯卽寶也解三界空一切自然斯卽寶也

蓮華淨菩薩白佛言何謂菩薩得至淨行世尊曰不爲愛欲所點汙斯則清淨心常鮮潔不協恚毒斯則清淨於三界塵無所染礙斯則清淨不僥滅度不忽生死斯則清淨不計終始出入無爲斯則清淨常行大慈不捨大哀斯則清淨無大道想無小道想斯則

清淨光英菩薩白佛言何因緣菩薩光曜普照佛言然燈廟寺學問智慧博綜無厭顯授道明令達真僞遵習聖典十二部經度諸有海二六牽連常志大乘消衆人患至微妙慧斯則菩薩光耀普照解縛菩薩白佛言何緣菩薩解一切縛佛言了三處空於去來今無所想著三垢則除分別色空痛想行識亦復如是一切本無不著不斷一無所求亦無所捨是爲菩薩解一切縛寶事菩薩白佛言以何爲寶以何爲石世尊曰歸佛法衆不爲非法棄捨諸徑九十六種不樂聲聞緣覺之乘常志大道大慈大悲救濟衆生五

道之惑是則爲寶十二因緣所見迷謬不識大法空
無之慧是謂爲石恩施菩薩白佛言何謂菩薩施恩
衆生佛言其未發意者皆令發之其退轉者使不退
轉於諸所生使無所起其未具足至一生補處是爲
菩薩恩施一切帝天菩薩白佛言何謂菩薩能化諸
天佛言在於欲界現欲無常譬如人夢示清淨行在
于色界爲現大慈菩薩之行在無色界爲現深妙之
法無所依倚不倚欲界不倚色界不倚無色界不倚
小乘不倚大道是爲菩薩能化諸天水天菩薩白佛
言何謂菩薩解諸本淨世尊告曰菩薩了知一切諸

法如幻如化一切本無譬如水源本初清淨無有垢
濁所以者何水滴定住則清如故以了本無便逮法
身大導師菩薩白佛言何謂菩薩爲一切導世尊告
曰見慳貪者導令布施放逸者導令護戒恚怒者導
令忍辱懈廢者導令精進亂意者導令一心愚冥者
導令智慧其無道心導之大乘是爲菩薩爲一切導
龍施菩薩白佛言何謂菩薩不惜身命世尊告曰菩
薩觀世所有非常苦空非身我不有身身非我有一
切如影因形而現生死如是從心而成了一切空皆
無所求吾我自然吾我自然生死自然生死自然泥

洄自然泥洄自然大道自然是爲菩薩不惜身命爾時梵天白佛言甚哉法之大也誠難值遇從無數劫積行累德乃髣髴聞音幸遇大聖得聞斯法供養菩薩典要妙之化深邃之義以本屢聽解達是法故使彼人依行立號其斯聞經爲以見佛耳聽妙慧供奉聖衆濟人天路拔濟三趣使發無上正真道意體解三脫不廢三達雖未至道其德漸增如月初生如師子子無所畏難自在由已諸天龍神悉衛護之衆魔邪惡自然爲伏所在州城郡國縣邑莫不敬重出入應節十方諸佛威神化祐於時四天王白佛言快哉

甚哉大聖洪恩現神濁世令我之等得近安住遇斯妙化菩薩純慧如天中天有人發行入于大海獲如意珠爲一切願其人欣豫豈可訾量我等如是詣於大會瞻戴慈澤聽受甘露菩薩景則猶入大海得是寶珠當以宣布顯示同志爲菩薩行未曾信樂諸天之衆依福徒類當令亘然開心受學其信樂者倍令堅進而不迴轉佛言善哉四王誠如所云斯大法者難可見聞若一蹉跌以法永違於億千劫未曾值遇猶如一針墮深大海反覆求索寧易致乎四王白佛甚難甚難天中天佛言聞斯要典菩薩深法而不信

樂失不諷受累劫微錯不可再遭是故諸人欲得自致在在見佛聞深妙法疾至無上正真道者當勤諷誦讀奉持散示未聞敷演其義使蒙法典令人因修展轉相化其福難測正使三千大千世界如來充滿若族姓子族姓女供養奉事於百千劫一切施安佛滅度後各各興塔七寶峙立上至二十四天供養齋蓋妓樂歌頌亦百千劫福寧多不四王白佛甚多無極天中天不可譬喻佛言其有受斯三昧十法超日明定六度無極善權方便福越於彼所以者何雖供養侍佛不如受斯佛之遺典從大聖命諸行菩薩

一切學者皆由深經自致得佛於時慧施白佛言斯法甚深甚深若有信樂而不誹謗知爲佛之所護聞不欣悅狐疑譏訕不寫諷誦旣不自誦并止餘人使不遵學業難計量世世自誤墮墜三趣自服毒藥復勸他人自危身命投罔盲冥又危衆人斯大法者衆明之元毀巨就細殃疊難限生遠三寶甘在八處何謂八處一曰邊地二曰外道三曰貧賤四曰下賤五曰短命六曰醜陋七曰人所憎惡八曰夷人不解法者其有誹謗不信不樂大乘之業歸于八惡悔之無及佛言善哉善哉誠如所云無異憶念往古無數劫

時發菩薩意始學之初出家離欲得爲比丘名曰法樂常好雜句嚴飾之辭不志大乘深妙之化謂爲虛僞非佛正典乃以四阿舍而求果證以爲雅誨時有大學信大乘者名智度無極講空無慧深邃無際久修梵行悉共諷誦敷陳旨要宣布流美四輩洽聞法樂比丘所在坐上聞誦慧品輒誹謗之云非佛教自共撰合慎勿修學用因此罪墮大地獄十八圜圍受殃酷痛彌歷年劫阿難曰佛言如令佛國劫盡燒壞水災蕩溢痛寧息不佛言不得休廢所以者何若佛土壞徙至他方佛界圜圍所以者何斯大法尊三塗

所由去來今佛之父母也假使謗訕殃疊不朽佛告阿難欲知爾時法樂比丘不答曰不及佛言則吾身是用是之故護身口意勿妄誹謗以墮惡罪酷掠處者悔當何及佛告阿難後來世人覩有學法爲佛弟子聰達智慧演宣大乘散決疑網嫉供養者誹謗無知用憎人故并毀深經云不足宣假喻言之如一父母有十餘子兄弟相憎并謗二親如是阿難當來世人憎嫉同學誹謗正法其人受罪不可計量無以爲喻阿難曰佛假使自覺則悔過者當云何乎佛言其人殃咎轉當微輕雖復獲豐速得解脫故當自省改

變心口無輕妄言也佛言阿難受斯經典持諷讀誦
廣爲人說頌宣四周福祚難量諸天龍神健沓想阿
須倫迦留羅真陀羅摩休勒悉共擁護學斯經者諸
佛世尊悉共擁護若猛師子虎狼熊羆無敢燒者行
步出入常得自在未曾惡夢夢中但見佛塔寂志四
輩道士講經天龍鬼神皆欲見之諸佛世尊亦復如
是四大天王帝釋梵王皆欲見之悉共擁護用樂深
法菩薩篋藏超日明尊定故也佛時頌曰

學斯經典者 諸天悉敬護 龍神阿須倫
真陀摩休勒 迦留羅一切 無敢犯燒者

十方佛威神 皆共授尊之 天帝釋梵王
諸大神妙天 虛空持世者 欽渴悉欲見
臥起常安詳 未曾有卒暴 夢中見塔寺
不親惡因緣 體解深經要 常務分別說
聞者則暢達 不疑于大乘 無智少福者
不信毀正法 謂虛自合作 非佛之所說
以嫉妬學者 并謗弘邪訓 如兄弟相憎
并誣及二親

爾時有菩薩名曰大光白佛言何謂爲光何謂爲明
世尊告曰解了慧明心如虛空觀見十方去來現在

三世之事無所罣礙遠得權智神通已達坐觀一切
衆生根源無有去來因緣之想不礙四大不礙鐵圍
大鐵圍寶山於地水火風出入無礙所以者何地皆
空耳人不解地地不空者水不得前水不出入以空
之故轉相開通如人體中毛孔九十九萬以神通者
不見有身察之虛空無所罣礙是謂爲光觀一切心
已生未生有志無志道心欲心漏心盡心無漏之心
悉曉了見而爲講義各令得所是謂爲明說是語時
無數菩薩皆得神通光明無量普照十方佛告阿難
受斯經典宣示未聞令得流布衆生蒙度以致正真

阿難白佛言惟當受持要者何名此經佛言名超日
明三昧又名十定佛之決教多所成就譬如日明徧
照四域百穀藥木萬物變化皆因成熟斯定若茲一
切十方五道生死莫自能濟聲聞緣覺菩薩大道皆
由斯定而得成濟若千萬劫奉行六度而有妄想不
如達斯超日明定以大慧光照於十方德踰於彼佛
說如是賢者阿難大菩薩衆諸天龍神阿須倫等莫
不歡喜頂戴奉行

超日明三昧經卷下

音釋

經

超日明三昧經卷下

經

九

上卷

喉

侯二音
目半明也
燿廓開

鼻

受氣以鼻
受氣也
瓚 瓚同

蠢

蠢同

焮

焮俗作
焮 焮

峙

立也
岐 行貌

麤

粗同

獷

獷惡
犬猶濇

豐

豐爭端
又隙也
仿 勤數

婉

婉上宛下
義和意

憾

憾惡
犬猶濇

痛

痛五陰
中痛釋受
痛癢

義

義上宛下
義和意

憾

憾惡
犬猶濇

懼

懼同怖也

差

差特殊特
異特釋

瘡

瘡意殺
也

眩

眩該數
也

同

同

惰

惰協恐
迫也

闡

闡明也

存疑

阿惟越致

退一云阿
地證無生
法忍位

眩

眩該數
也

異同

方冊第十七

紙九行足
斷足

化

化

下卷

饋

饋餽同

淖

淖開泥

觥

觥抵觸

類人

樞

樞獸

髣

髣上

髣

髣下拂聞

健

健即乾

健

健

須

須

須

須

迎

迎即迎

迎

迎

真

真

真

真

摩

摩即摩

摩

摩

真

真

真

真

存疑

方冊第二

紙

紙

紙

紙

紙

紙

超

超日明

超

超

超

超

超

超

萬

萬一千

萬

萬

萬

萬

萬

萬

該

該銀十

該

該

該

該

該

該

善

善信萬

善

善

善

善

善

善

善

善信陸

善

善

善

善

善

善

果

果成男

果

果

果

果

果

果



符錄 大冊策二錄 十二字錄式十六
四行又六十二六

輦外傳 此云大輦
輦

或留羅 云金或真
唱或對羅 真到羅 此云錄
唱或羅

對杏悉 此云香
唱或對悉 阿真命 此云無
唱或命

人 此云
唱或人 羅 此云
唱或羅 羅 此云
唱或羅 羅 此云
唱或羅

普 此云
唱或普

除恐災患經

乞 伏 泰 沙 門 釋 聖 堅 譯

聞如是一時佛遊王舍城竹林精舍與四部弟子大
衆俱會說上妙法爾時維耶離國癘氣疫疾威猛赫
赫猶如熾火死亡無數無所歸趣無方療救國王大
臣長者居士婆羅門集會博議國遭災患非邪所摧
疫火所燒死亡無數當以何誼設何方便以除災害
婆羅門議言當於諸城門設祠祀壇或有議言當於
城中四衢路頭立大祠祀禳却害氣或有議言當用
白馬白駝白牛白羊白鷄白狗種種百頭而以祠祀

鎮禰解除以禳却之時衆會中有一長者名曰彈尼
此言大明奉佛五戒修行十善爲清信士諦證道跡時發
議曰唯聽所言國遭災患死亡無數如仁等議害生
救命豈得然乎以先世時所行不善今遭斯厄當設
方便以善禳惡永無苦別如何反倒行害求安長夜
受苦無有出期時諸大會問才明曰當設何誼才明
對曰世有大怙三千世界天人之師一切覆護慈愍
衆生號曰爲佛獨拔三界若能降致光臨國者災害
可除大衆聞之皆然其議莫不稱善才明又曰佛無
數劫修治六度布施無限國城財寶象馬車乘頭目

髓腦肌體妻子戒忍精進一心智慧每生自尅不可
計量以求佛道不爲己身但爲衆生救濟危厄消除
衆患生老病死地獄鬼神畜生之苦今成佛道順其
本誓周行濟救授甘露藥消除衆生今世後世苦毒
之患永令獲安衆會咸曰如仁所言甚誠大快佛在
王舍阿闍世王與吾國嫌豈當聽佛來至此耶或復
有言僞聽佛來時才明曰佛興出世救衆生苦猶如
虛空無所罣礙誰能制止猶如日光萬物萌生莫不
蒙育佛憐國厄必來無疑但遣重使貢遺琦珍温辭
雅謝詣阿闍世又別歸佛委命酸切心雖懷嫌信使

賢重貢遺妙寶詞理柔輒事無不泰自古以來隣國
不協還相侵叛皆由明使名寶重貢軟詞遜順而得
和協展轉相謂思惟任使爾時大衆國王大臣長者
居士皆同意言唯清信士長者才明是佛弟子可以
爲使往行請佛所以者何先衆開建請佛之議便告
才明唯仁可往詣王舍國與王相聞求請佛來爾時
才明受使欲往於時大衆皆起退坐向佛方面又手
長跪五體投地以頂禮佛跪告才明佛天中天慈悲
喜護加於羣生唯隣鄙國遭遇大患疾病死亡猶猛
野火焚燒草木普遭困厄幸佛世尊猶冥求曉寒願

朝陽渴暑陰飲病追良醫迷者求道唯願世尊垂降
救濟授甘露法令得甦息於是才明受命爲使詣羅
閱祇涉路逕達到王舍城詣門求通書命貢遺時王
聽現才明啓言奉使詣國前雖不和無他重隙故先
致虔除前不協俱綏萬民佛興於世大慈普覆國有
重患因命請佛唯願大王勸佛廻光顧臨鄙國救濟
災患冀蒙神祐王默思惟適欲留佛令不出國無理
得爾非力所制佛以大慈普許十方等視憎愛救濟
爲務以是之故不可留之便告才明可詣佛所宣遺
國命於是才明辭詣竹林行到精舍見佛世尊盡虔

禮敬五體投地右繞三市長跪叉手而白佛言維耶
離國諸王大臣長者居士遙禮佛足唯天中天普慈
衆生莫不蒙濟鄙國遭厄唯願世尊垂恩降光憐愍
苦厄令得甦息時佛默然許其所請才明見佛受請
許往歡喜無量時王舍國境內神祇天龍鬼神知佛
受請當詣他國莫不躁動慘然不悅便現感應語其
國王阿闍世曰大王如何安然無憂於今不久當違
離佛猶如嬰兒失其二親喻行曠路斷失水漿譬如
猛寒亡失衣裳今佛當行國失恃怙其喻如是王聞
神祇降應說是情卽愴然甚懷愁苦默然思惟衆生

頑愚志性鈍濁今離世尊安從復得智慧之礪磨
鈍心誰當濟其塵勞重愆宿世重責誰當誨除一切
衆生重罪令輕吾等久在生死牢獄重關所閉誰當
復以正法之鑰開生死獄重關牢閉吾等普爲勞垢
盛陽暑熱所炙安從復得佛清涼教月精明珠消除
炎熱王卽勅嚴駕出詣佛所稽首佛足右繞三市却
坐常位時佛爲王說正法化初中竟善淨身口意清
淨微妙王心歡喜叉手白佛聞維耶離使請世尊承
已許往心甚懷慘無方留尊唯垂矜愍特受鄙請住
宮三月佛告王言衆生可傷若住三月何時當周衆

苦厄者吾無數劫苦身求道爲衆生故願欲成佛以
甘露藥施於衆生今願已成猶如有人合和神藥欲
救衆患值遇病者違其本誓而不授與則非良醫若
在江側見漂流人不往救度非賢士宜若於曠野見
失路者不示正道是則非仁吾以大慈普愍衆生故
遊諸國縣邑村落救濟衆苦傳甘露藥無恃者恃無
歸者歸王重白佛唯垂慈恩許受二月佛故不許王
重懇慙長跪叉手垂泣白言命難可保猶露然燈遇
無常風奄忽便滅今與佛別何時當復更覩尊顏幸
受二月佛重不許王便投身於佛足下唯願世尊特

加大慈與弟子衆許住一月世尊不忍即便許受王
便還起心悅懷敬繞佛三匝禮辭還宮勅厨饌具百
味之飯極令精好鮮甘香潔宮裏張施繒絲幡蓋雜
寶牀機統縵座具掃除繕治香汁灑地衆事辦畢明
日時至王於正殿遙向世尊燒香長跪佛天中天聖
達知時願與聖衆廻降神光到宮蔬食於時世尊勅
諸弟子法服執器行詣王請佛與聖衆俱至王宮王
卽盡虔奉香妓樂宮門迎佛入各就座王自行水周
徧聖衆手自斟酌百味飯食鮮潔香甘一切平等日
日供養飯食臥具疾藥所須令勅外宮治填道路種

植行樹七行街路乃至江水頓息帳幔及床座具嚴飾旛蓋猶如天街更新造作五百七寶蓋維耶離國聞佛當至亦復平治七行階路種植行樹帳幔牀座國王大臣長者居士各從大眾出國迎佛一月期滿佛與聖衆出宮臨路王從大眾華香散佛周徧覆地大眾來集猶秋水漲投于大海白明珠校七寶蓋王以恭敬手執奉上以覆世尊佛與大眾尋路而行至江水側時王上佛五百七寶蓋大海龍王亦復敬奉五百七寶蓋恒水諸龍亦俱上佛五百七寶蓋時天帝釋將諸天衆亦復獻佛五百七寶蓋時維耶離

大眾迎者服飾嚴麗青馬青車青蓋青旛服飾皆青赤馬赤車服飾皆赤黃馬黃車服飾皆黃白馬白車服飾皆白黑馬黑車服飾皆黑色色殊別將從無數佛遙見之告諸弟子欲知天帝出遊觀時威儀如是維耶離國奉迎上佛五百七寶蓋各以其蓋前至佛所各白佛言佛中天普世覆蓋願受蓋施佛受其施餘留一蓋時諸大眾心各懷疑不審爲是宿世積德行蓋之報海龍恒龍仞利天帝維耶離國羅閱祇王各各奉上七寶妙蓋同時俱會又疑何故不受一蓋於是阿難知衆懷疑長跪又手前白佛言唯天中

天大衆並疑今日何緣有是二千五百七寶寶蓋同時俱至奉上世尊爲是前世善本報乎今現福耶唯願世尊決一切疑佛告阿難一心專聽今當決除汝等所疑乃往過去無央數劫時有轉輪聖王名曰摩調此言大典主四域王有千子七寶導從王末少子見其父王七寶御蓋還問母曰我當何時得服此蓋以自光飾母言唯子王千子中汝最末小若無大王太子承嗣若太子崩以次承嗣展轉千人汝骨朽腐未央得蓋重問母曰無蓋望耶因聞有死形骸當朽宿福追逮悚然心恐唯人生世必當有死因報母曰唯

願見聽捨家學道母甚慙傷不違其願母告之曰聽汝捨家若卿道成要還見吾爾乃相聽對曰如勅道成當還卽詣林藪除荆鬚髮被著法服靜處勤修精進不懈竭盡塵勞成緣覺道遊行諸國縣邑村落福度衆生所種善本忽憶母要便上昇空猶如鴈王還本國宮與母相見闔宮大小見道士神通莫不歡喜王諸嫁女八萬四千共請令住道士慈仁不逆一切便受其請諸嫁女輩於宮後園爲設廬屋止宿其中舉官供養衣食牀臥疾藥所須朝暮禮事一切世間壯者皆老強健必病生者皆死時辟支佛於其宮園

便捨壽命舉官媵女薪油華香供養以禮斂骨起塔
朝暮禮拜燒香然燈時王大天巡四域還臨幸後園
見有此塔顧問侍臣何故有是媵女對曰此是聖王
最下少子離家學道於此壽終爲立是塔因重發問
是誰之子何緣捨家便召其母而問之曰是卿子耶
對曰唯爾又復問曰何緣學道其母曰王是兒往昔
見王出遊卽還見問王七寶蓋不審何時在我上旋
妾便告言太子應繼承嗣聖王展轉千子汝骨朽敗
永無蓋望子聞妾言慘然畏死求行學道妾輒聽之
勤學道成妾等請住供養盡壽建立此塔王復問曰

子以蓋故行學道耶對曰如是王愍其子不得蓋故
學道盡壽生不得蓋今便以蓋覆其塔上王因發願
今以此蓋奉得道塔緣是福報願成佛道濟度衆生
生老病死王心悚然知世非常無免死者因立太子
承嗣聖位王捨四域七寶千子八萬四千後宮媵女
剃除鬚髮行作沙門靜處學道修四淨行慈悲喜護
畢其形壽上生梵天佛告大衆於卿等意所志云何
王大天者豈異人乎莫造斯觀則吾是也時以一蓋
上緣覺塔以是福報於此地上爲轉輪王不可稱數
上爲天王天上世間受福無限一蓋餘福吾應於世

二千五百返爲轉輪王王四天下阿難又問世尊何故不受一蓋佛言是吾一世轉輪王福所以捨置而不受者以此福報施後末世受吾佛法化爲弟子者學士學女欲令此等不乏衣食牀臥疾藥過去諸佛法沒盡時其有學道或因恐怖或因饑窮不得行道正法沒盡其有末世於吾佛法捨家學道被服法衣稱佛爲師畜妻養子此等皆尚得人供養何況精勤修奉禁戒守淨行者至吾法盡不得供養耶羅閱祇王勅其部界令於江上更造新橋佛與聖衆得乘度江維耶離國亦復造橋欲使佛過恒水諸龍遞相交編

結龍爲橋請佛乘度時佛思惟若乘羅閱祇所造橋度恐維耶離國及諸龍王心懷微恨乘維耶離所造橋度恐阿闍世及龍懷恨欲乘龍橋恐二王有恨佛又思惟今當分身令於三橋皆有佛過佛垂臨橋王阿闍世與其將從數億衆生香華雜寶妓樂供養佛法聖衆王與羣臣一切大衆數億千人五體投地自歸悔過垂泣送佛佛現神化於二王橋及諸龍橋皆現有佛與聖衆俱天龍鬼神乘橋度江王舍國王維耶離王恒水諸龍各自見其所作橋上佛將大衆乘橋度江各不知見更有佛在餘橋上過獨自見橋佛

登度江佛適度江已竟見八萬四千餓鬼身出煙火
其中未得道者見此火皆恐怖是何大火譬如燒其
大山見此大火或來近水或遠於水阿難悉知一切
人意長跪叉手白佛言佛天中天佛至尊至重天上
天下最尊一切衆生見此火者無不恐怖此何等火
願佛爲一切衆生說此何等之火佛語阿難今此餓
鬼先世不逢佛亦不聞法亦不見比丘僧亦不知世
間有罪福生爲餓鬼如今見佛奔趣歸向皆爲頭面
著地長跪叉手白佛言佛天中天至尊至重天上天
下憐愍一切衆生蜎飛蠕動有形之類佛爲一切衆

生之父母使我墮餓鬼佛度我我亦如一切衆生之
類佛亦知餓鬼先世所種佛爲一切衆生故問餓鬼
前世所種行今爲餓鬼餓鬼曰先身雖見佛不知有
佛雖見法不知有法雖見比丘僧不知有比丘僧我
亦不作福教他人亦不作福作福有何等福不作福
有何種罪見人作福言恒笑之見人作罪意常歡喜
佛問餓鬼生此餓鬼之中以來至今更歷幾百年歲
餓鬼報言我生中七萬歲佛問餓鬼生中七萬歲食
飲何種爲得何食餓鬼報言我先世種行至惡遇值
小水卽化不見至於大水便爲鬼神龍羅刹所逐言

汝先世種惡今何以來近此江海雖值大龍普天放
雨謂呼得雨雨漬其身方更礫石熱沙或值炭火以
墮其身佛問餓鬼生中七萬歲由來飲食何等餓鬼
報佛言或有世間父母親里稱其名字爲作追福者
便小得食不作福者不得飲食諸餓鬼叉手白佛言
從來饑渴佛天中天慈愍一切衆生今賜餓鬼小飲
食佛語阿難捉鉢取水用布施餓鬼阿難便捉鉢取
水與餓鬼餓鬼白佛言今此一鉢水不飽一人況乃
八萬四千佛語諸餓鬼八萬四千捉此鉢水至心布
施佛及諸弟子諸八萬四千餓鬼捉此鉢水長跪布

施以我先世不布施今我生餓鬼中如今無所有持
此鉢水布施佛及諸弟子使諸餓鬼緣此功德遠離
三惡道後所生得師如佛無異餓鬼過水與阿難阿
難捉水與佛嘗一口過與千二百五十弟子各嘗一
口佛語諸餓鬼入大江飲水并可洗浴江海龍鬼神
遮不得洗浴飲水佛語海龍王及諸鬼神無極之水
何以愛惜諸龍鬼神言不惜此水以餓鬼不淨故佛
語海龍王鬼神卿身自從無數劫已來亦作此身愛
惜無極之水卿後還作此身以慳貪故生爲餓鬼諸
海龍王鬼神聞佛言盡還入海聽諸餓鬼盡得飲水

飽滿洗浴還出繞佛三匝爲佛作禮叉手白佛言佛
天中天知當來過去何時當脫此餓鬼之身佛言以
一鉢水故後當彌勒佛出世人壽八萬四千歲現諸
餓鬼盡得人身皆得阿羅漢道其諸聚會聞此布施
功德者皆得正真道意諸一切餓鬼繞佛三匝作禮
而去維耶離國諸王大臣長者居士國人無數五體
作禮自投佛足歸命三寶香華妓樂繒蓋幢幡奉迎
世尊華徧覆地尋路供養日日不絕至于國城佛與
聖衆天龍鬼神往于城門以金色臂德相之手觸城
門闢以梵清淨八種之聲而說偈言

諸有衆生類 在土界中者 行住於地上
及虛空中者 慈愛於衆生 令各安息
晝夜勤專精 奉行衆善法

說此偈已地卽爲之六反大動佛便入城空中鬼神
昇空退散地行鬼神爭門競出城門不容各各奔突
崩城而出於時城中諸有不淨廁穢臭惡下沉入地
高卑相從溝坑皆平盲視聾聽瘧語蹙行狂者得正
病者除愈象馬牛畜悲鳴相和箜篌樂器不鼓自鳴
宮商調和婦女珠環相振妙響器物琬甌自然有聲
柔輒和暢妙法之音地中伏藏自然發出一切衆生

如遭熱渴得清涼水服飲澡浴泰然甦息舉城衆病
除愈解脫亦復如是佛與大衆便還出城垂大慈哀
欲爲衆生施大擁護繞城周匝門門呪願敷演妙法
除凶致祥普國疾患災疫悉除國界盡安於是才明
前禮佛足長跪又手白世尊言前許垂愍唯願明日
與諸大衆愍衆生故迴光顧臨至舍蔬食佛默聽許
歡喜踊躍右繞三匝禮佛而退歸家供辦百味飯食
清淨香潔色鮮味甘嚴飾家裏懸繒幡蓋牀座綰綰
香汁灑地散華燒香供設備辦遂於門中長跪燒香
遙白佛言幸時降神爾時世尊勅諸弟子著衣持鉢

行詣長者才明受請卽到其門才明肅恭華香妓樂
請佛入舍佛與聖衆以次就位於時才明執持金瓶
躬行澡水手自斟酌上下平等飯食畢訖重行澡水
長跪叉手前白佛言唯願世尊垂四等心更受三日
如今之請佛默便許於是才明供佛聖衆種種香潔
如其初日四日已竟以金色氎價直十萬次到上座
九萬價氎以次轉下末下坐者萬錢價氎以爲蹉覷
其妻卽起長跪叉手白世尊曰唯天中天慈加人物
願留神光受賤妾請更住四日佛默然許其妻供養
初日後日至於四日飯食香潔等無差異四日已竟

又以金色十萬價鬻奉世尊次九萬鬻最下萬錢
時才明子起至佛前長跪叉手白世尊言唯天中天
已受父母各四日食幸垂慈哀憐愍受我四日之請
佛亦默許其子恭勤四日供養飲食甘美亦如父母
卽以金色十萬價鬻奉獻世尊次座九萬末下萬錢
子婦又起長跪白佛世尊弘慈已受翁姑及夫供養
幸如前比復受四日佛又默受所設肴饌如前無異
亦至四日亦以金色十萬價鬻次座九萬下座萬錢
以爲噫嘍居家大小於佛前坐奉受訓誨佛爲頒宣
敷演四諦苦集盡道八賢聖路斷除勞意二十二結

證諦溝港維耶離國諸王大臣長者居士闔國人民
皆生心念佛來至國爲獨以一才明故乎意皆懷嫌
象馬車步皆共來集向才明家欲壞其舍得見世尊
大衆震動響響有聲佛悉預覩故問阿難外有何聲
阿難白佛維耶離王大臣長者國人巨細皆懷怨心
世尊入國才明請歸獨固在家至十六日餘不得見
以此爲嫌故集會來欲見世尊佛告阿難出慰諸人
莫賈恨意欲見佛者便聽使入阿難宣命謂諸大衆
以啓聽入國王大臣及一切人聞佛教告怒心霍除
無餘微恨如雨淹塵便入見佛五體投地稽首佛足

大衆浩浩其舍不容在外者衆佛悉慈愍化才明舍
令爲瑠璃表裏清徹悉通相見於是才明爲設牀座
氍毹毼毼種種食具水精瑠璃金銀雜寶以爲器物
大衆食訖於是才明前白世尊及諸貴賓居儉蔬食
枉屈願臨願以食器及牀座具以相貢遺時會大衆
莫不愕然皆共歎咤長者才明立名不妄與德相副
興設大施貢遺寶器莫不周徧家中財寶豈可貴計
四部弟子及與大衆心皆懷疑長者才明有何功德
請佛大衆至十六日及王臣民供養貢遺周徧一國
得服甘露前世福耶今世德乎阿難卽知衆會心疑

長跪叉手前白佛言大會懷疑長者才明於何福田
廣植德本遭何明師受其教誨今遠影報財富無限
心明行淨先服甘露惟願世尊現說本行決一切疑
佛告阿難及諸大會一心善聽今當解暢心之所疑
往世有城名波羅柰去城不遠山名仙居山中池水
林樹華果快樂無比世有佛時與諸弟子遊處其中
若世無佛緣覺居中若無緣覺外學神仙則居其中
初無斷絕以是之故斯名仙居時有緣覺在山中止
早起澡漱法服持鉢出山求食未至聚落遇暴風雨
去道不遠有官果園中有園監見有煙出道士往詣

報語主人行遇風雨幸聽入舍向火爆衣卽請令人
取薪然火爲曝衣裳衣乾體暖風雨小歇著衣欲出
園監問曰唯聖道士欲何所至答曰賢者一切有形
衣食爲命吾捨家學道乞食自存若不得食身命不
濟諸根不定不能思道園監對曰貧家蔬食色麤味
酸若垂甘受幸住勿行緣覺答曰學道求食不著色
味充軀而已若相許食便住不行於是園監便歸取
飯至家問婦飯食辦未對曰已辦其園食法分飯別
食夫語婦曰取吾分來偶有要客欲以食之妻卽念
言夫爲男子當執勞役涉冒寒暑假令不食不能執

勞妾爲女人在家閑處可持妾分以待此客其子又
言父母年老便可自食以我分與其子婦曰翁姑及
夫已許食客妾年幼壯堪忍饑渴乞以妾分持用食
客大人便言汝等各各善心欲施可共減取衆人之
分足以食客卽便各減已之飯分園監又念道士衣
裳裂壞形露因問其婦家中少有衣裳調無其妻對
曰家中唯有一領氈衣會賓應門更共衣之餘無所
有夫答婦言以前世時無所惠施今守貧賤不及逮
人今者不施貧窮下賤何時當竟富貴豪尊衣食自
然者皆是前世惠施之福今續惠施無有厭足我亦

不用會客應門改易服飾取麩并飯家屬皆往到道
士所澡手奉食道士食訖澡漱滌鉢四人奉麩共授
緣覺卽便衣之緣覺不以說法教化現通神足悅悟
衆生令發道意告主人曰已能惠施供養道士堅強
汝志發弘誓願語竟昇空結跏趺坐住立經行變現
緣覺充滿虛空各各現化身出水火水不滅火火不
侵水若干變化乘空飛行還仙居山園監眷屬歡喜
踊躍叉手作禮叩頭求哀便發誓願以今日惠施聖
明神聖道士緣是福報離三惡道地獄餓鬼畜生之
趣所生之處常共聚會天上世間饒富安隱覺慧道

力服甘露味如聖明師若遭明師神德殊勝佛告大
衆時園監者則才明是妻息子婦皆是本人爾時同
心施尊緣覺自是已來九十一劫不更三途受妙福
報天上世間室家聚會不相遠離爾時發願願服甘
露覺道得解遭殊勝師緣是之故今遭值我得遇勝
覺無限無喻今服甘露如其先師爾時大會聞佛頌
宣功德報應莫不歡喜心悅意清自歸三寶佛法聖
衆險結除解或受五戒或捨家學道於是會中有四
千人皆得道迹往來不還無著之果無央數人發大
乘意心不退轉於是世尊起出其舍一切大衆稽首

各退佛與大眾遊至柰女林樹精舍柰女聞佛從大
聖衆至其樹園心喜無量即便嚴駕與其僕從詣園
見佛到下寶車如雲降電趨翔入園如吉利天服飾
姿容殊天王女圍樹諸天莫不迴目佛見其然是魔
使來壞敗淨戒定慧解脫度知見品卽以梵音告諸
沙門柰女來至各檢汝意各自執持精進力弓皆自
嚴辦智慧之矢被定意鎧乘戒車與塵勞戰汝等
當計女人所有欺誑一切如金塗錢皮薄如蠅翅以
覆惡穢筋骨連綴血肉之聚目眇淺唾身體汗垢若
不洗拭作是計念觀女人身以制迷惑色欲之意諦

觀骨舍束縛以筋塗以血肉覆以衣服飾以華綵猶
如畫師立墻以整泥塗汗聖畫以彩色女人之身亦
復如是當諦忖知除滅婬心夫欲學道先調其心後
可獲安不先調心後悔無及邪行迷旋譬如櫪馬臨
其壽終願與意違終不解脫其有視色心隨惑者無
常計常苦有樂想無我計我不淨淨想慧覺無常苦
空不淨達如是者卽離長途生死患難佛以是教告
諸弟子皆共受持一心奉行柰女見佛如日出雲金
光照曜發清淨意五體投地稽首佛足却坐一面佛
告柰女女人情逸惑著五欲汝能御心迴屈詣佛所

樂妙法化是汝最利男子安重塵勞垢薄樂受法化
此不爲奇女人纏綿塵勞羅網盤旋周障不識出要
一切世間苦空無常不可怙恃彊疾侵壯老失顏色
死劫壽命危侵安隱欲離是患專精受法勤修奉行
乃免斯苦女人怨憎相遇甚惡亦甚戀慕恩愛之別
凡爲女人每不遠離於此二事是故女人當勤奉法
可離怨會恩愛離別不復遭遇生老病死衆苦都滅
奈女聞佛若干妙化女人之穢心懷慙愧卽起長跪
叉手白佛願垂慈哀與聖衆俱至舍受食佛卽默受
於是奈女稽首而退還歸辦具百味之食甘脆精美

張施旛蓋牀座統縵香汁灑地燒香散華長跪請佛
日時已到願與聖衆垂廻臨赴佛與弟子著衣持鉢
至奈女家華香妓樂請佛入舍各就座位手自斟酌
行水奉食訖澡漱佛爲廣說布施福報戒慎之果
天人快樂不得長久危亡別離不可怙恃唯四聖諦
八賢聖路以獲大安永無憂患心皆歡喜疑除結解
得須陀洹衆坐懷疑奈女前世有何功德從樹華生
端正姝好賢者阿難知衆懷疑長跪叉手前白佛言
衆坐悉疑奈女前世於何福田植何德本今遇世尊
服甘露藥佛告阿難乃前過世迦葉佛時人壽二萬

歲佛事終竟復捨壽命爾時有王名曰善頸供養舍利起七寶塔高一由延一切衆生然燈燒香華蓋繒綵供養禮事時有衆女欲供養塔便共相率掃除塔地時有狗糞汗穢塔地有一女人手撮除棄復有一女見其以手除地狗糞便唾笑之曰汝手以汗不可復近彼女逆罵汝弊姪物水洗我手便可得淨佛天人師敬意無已手除不淨已便澡手繞塔求願今掃塔地汗穢得除令我來世勞垢消滅清淨無穢時諸女人掃塔地者今此會中諸女人是爾時掃地願滅塵勞服甘露味爾時以手除狗糞女今奈女是爾時

發願不與汗穢會所生清淨以是福報不因胞胎臭穢之處每因華生以其爾時發一惡聲罵言姪女故今受是姪女之名佛爲廣說善惡報應天上世間榮樂歡娛三惡道苦更相吞啖愁毒號哭爾時衆會聞佛所說歸命三尊佛法聖衆除身口意奉行十善無央數人各於三乘建立道意一切歡喜繞佛三匝作禮而去於是世尊還至精舍

除恐災患經

音釋

禪么琰切

琦渠宜切

礪力制切

純統於阮切

純統於阮切

坐

0 1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

褥彼戟切也。筵不能行也。氍毹直庚切。毳毼胡江切。長頸毼毼也。毼烏莖切。毼都滕切。毼細者也。

毼其俱切。毛布也。毼毼也。毼毛席之。毼細者也。

咳赤脂切。日。擊吉歷切。至過各切。樞郎狄切。脆此。

斷也。



雲棲寺比丘廣聞施貲刻此。計字七千八百七十。茲

除恐災患經一卷。淨住沙彌契机同對。

銀三兩九錢三分五厘。崇禎二年夏月徑山化城寺識。



千一卅九